

摘藻堂四庫全書薈要

史部

欽定四庫全書薈要

史部
元史卷二十五至
七

詳校官主事銜臣徐以坤



欽定四庫全書薈要卷六千四百四史部

元史卷二十五

明翰林學士亞中大夫知制誥兼修國史宋濂等修

紀第二十五

仁宗二

延祐元年春正月丁亥授中書右丞劉正平章政事商
議中書省事丙申除四川酒禁興元鳳翔涇州邠州歲
荒禁酒庚子敕各省平章為首者及漢人省臣一員專

意訪求遺逸得其人先以名聞而後致之以江浙行
中書省左丞高昉為中書參知政事丁未詔改元延祐
釋天下流以下罪囚免上都大都差稅二年其餘被災
曾經賑濟人戶免差稅一年庚戌中書省臣圖古勒等
以災變乞罷免不允二月庚申立印經提舉司戊辰大
寧路地震癸酉熒惑犯東井甲戌以侍御史趙世延為
中書參知政事詔免蒙古地差稅二年商賈勿免己卯
給鈔六千三百錠賑濟良鄉諸驛壬午以哈克織為中書

右丞相監修國史癸未以中書參政高昉為集賢學士
三月壬辰太陰掩熒惑賜諸王達實蒙古鈔千錠衣二
襲戊戌真定保定河間民饑給糧兩月己亥白暈亘天
連環貫日癸卯暹國王遣其臣愛耽入貢改南劍路曰
延平劍浦縣曰南平乙巳以僧人作佛事擇釋獄囚命
中書審察丙午封阿魯圖為趙王戊申車駕幸上都己
酉敕奸民宮其子為閹宦謀避徭役者罪之辛亥命參
知政事趙世延綱領國子學癸丑中書平章政事察罕

致仕晉寧民侯喜兒昆弟五人並坐法當死帝歎曰彼一家不幸而有是事其擇情輕者一人杖之俾養父母毋絕其祀閏三月甲寅朔敕減樞密知院冗員辛酉太陰犯輿鬼罷呪僧月給俸遣人視大都至上都駐蹕之地有侵民田者計畝給直丙寅太陰犯太微東垣丁丑畿內及諸衛屯軍饑賑鈔七千五百錠汴梁濟寧東昌等路隴州開州青城齊東渭源東明長垣等縣隕霜殺桑果禾苗歸州告饑出糧減價賑糶馬八兒國主昔刺

木丁遣其臣愛思丁貢方物夏四月甲申朔大寧路地震聲如雷丁亥敕儲青海五條河屯田粟以備賑濟太常寺請立北郊不允陞延慶寺秩正二品西番諸驛貧乏給鈔萬錠奇嚕部畜牧斃耗賑鈔八百七十三錠已丑廢真陽含光二縣入英德州壬辰諸王托克托薨以諤斯伯襲位己酉敕郡縣官勤職者加賜幣帛以特們德爾錄軍國重事監修國史立回回國子監帝以資治通鑑載前代興亡治亂命集賢學士和搭拉都哩默色

及李孟擇其切要者譯寫以進武昌路饑命發米減價

賑糴五月甲寅朔賜營王額森特穆爾鈔萬錠戊午辰

星犯輿鬼丁卯賜李孟孝感縣地二十八頃禁諸王支

屬徑取分地租賦擾民敕嶺北行省瘞陣沒遺骸乙亥

賑吉魯爾地貧乏者米三千石丁丑徙滄州治於長蘆

鎮戊寅京兆為故儒臣許衡立魯齋書院降璽書旌之

庚辰盧陽麻陽二縣以土賊作耗蠲其地稅賦營王額

森特穆爾支屬貧乏賑糧兩月武陵縣霖雨水溢溺死

居民漂沒廬舍禾稼潭州漢陽思州民饑並發廩減價
糶賑之膚施縣大風雹損禾並傷人畜六月戊子敕內
侍今後止授中官勿畀文階置雲南行省儒學提舉司
封河南省丞相布琳濟達為河南王壬辰增置畿內州
縣同知主簿各一員諸王徹伯爾屬戶匱乏給糧一歲
仍俾屯田以自贍發軍增墾河南芍陂等處屯田乙未
熒惑犯右執法戊申增置兩浙鹽運司判官一員甲辰
拘河西僧免輸租賦璽書敕諸王戚里入覲者宜趣夏

時芻牧至上都毋輒入京師有事則遣使奏稟衡州郴
州興國永州路耒陽州饑發廩減價賑糶宣平仁壽白
登縣雹損稼傷人畜秋七月乙卯扎吉尼所部匱乏戶
給糧二石庚午命中書省臣議復封贈賜晉王伊蘇特
穆爾部鈔十萬錠開下番市舶之禁賜衛王阿穆爾克
等鈔七千錠乙亥會福院越制奏旨除官敕自今舉人
聽中書可否以聞申飭私鹽之禁沅陵盧溪二縣水武
清縣渾河決淹沒民田發廩賑之八月戊子車駕至大

都癸卯陞太常寺為太常禮儀院秩正二品丁未冀寧

汴梁及武安涉縣地震壞官民廬舍武安死者十四人

涉縣三百二十六人台州岳州武岡常德道州等路水

發廩減價賑糶九月壬戌改提點教坊司事為大使已

已復以特們德爾為右丞相哈克繖為左丞相罷陝西

諸道行御史臺降儀鳳卿為儀鳳大使肇慶武昌建德

建康南康江州袁州建昌贛州杭州撫州安豐等路水

發廩減價賑糶冬十月癸巳陞潁州萬戶府為中萬戶

府乙未敕吏人轉官止從七品在選者降等注授申飭
內侍及諸司隔越中書奏請之禁敕下番商販須江浙
省給牒以往歸則征税如制私往者沒其物遣官括淮
民所佃閑田不輸稅者丙申復甘肅屯田置沙瓜等處
屯儲總管萬戶府秩正三品乙巳置恩平王塔斯布哈
傳二人庚戌辰星犯東咸監察御史言乞命樞密院設
法教練士卒應軍官襲職者試以武事而後任之制曰
可遣張律經理江南田糧十一月壬子陞司天臺為司

天監秩正三品賜銀印乙卯改大同侍衛親軍都指揮使司為中都威衛使司置保安軍於麻陽縣以禦徭蠻戊辰以通政院使蕭拜珠為中書右丞辛未以翰林學士承旨達實密知樞密院事癸酉敕吏人賊行者黥其面大寧路地震有聲如雷戊寅特們德爾言比者僚屬及六部諸臣皆晚至早退政務廢弛今後有如此者視其輕重杖責之臣或自情亦令諸人陳奏帝曰如更不悛則罷不敘以前中書右丞相圖古勒知樞密院事靜

安路饑發糧賑之詔檢覈浙西江東江西田稅十二月
壬午汴梁南陽歸德汝寧淮安水救禁釀酒量加賑恤
癸未賑諸王特穆爾布哈部米五千石圖們部二千石
辛卯禁諸王駙馬權勢之人增價鬻鹽壬辰詔定官員
士庶衣服車輿制度甲午太陰犯輿鬼己亥敕中書省
定議孔子五十三代孫當襲封衍聖公者以名聞庚子
遣官浚揚州淮安等處運河以翰林學士承旨李孟復
為中書平章政事癸卯太陰犯房甲辰太陰犯天江乙

已勅經界諸衛屯田沔陽歸德汝寧安豐等處饑發米賑之

二年春正月乙卯歲星犯輿鬼戊午懷孟衛輝等處饑發米賑之己未太白晝見癸亥太陰犯軒轅丙寅霖雨壞渾河隄堰沒民田發卒補之禁民煉鐵發卒浚澠州漕河丁卯太陰犯進賢戊辰晉寧等處民饑給鈔賑之己巳置大聖壽萬安寺都總管府秩正三品庚午立行用庫於江陰州敕以江南行臺贓罰鈔賑恤饑民乙亥

詔遣宣撫使分十二道問民疾苦黜陟官吏並給銀印
命中書省臣分領庶務禁南人典質妻子販買為驅御
史臺臣言比年地震水旱民流盜起皆風憲顧忌失於
糾察宰臣變理有所未至或近侍蒙蔽賞罰失當或獄
有冤濫賦役繁重以致乖和宜與老成共議所由詔明
言其事當行者以聞諸王托里特穆爾部闕食以鈔七
千五百錠給之益都般陽晉寧民饑給鈔米賑之二月
己卯朔會試進士戊子太白晝見癸巳太白經天甲午

詔禁民轉鬻養子丙子賜諸王納古爾岱爾金五十兩
銀二百五十兩鈔五百錠庚子詔以袞噶諾爾布喇實
嘉勒燦巴勒藏布為帝師賜玉印壬寅雲南王羅丹來
朝辰沅洞蠻吳干道為寇敕調兵捕之乙巳賜諸王伊
魯特穆爾鈔萬錠丙午太白經天是月晉寧宣德等處
饑給米鈔賑之真州揚子縣火發米減價賑糶三月乙
卯廷試進士賜呼圖克岱爾張起巖等五十六人及第
出身有差丙辰太陰赤如赭庚午帝率諸王百官奉玉

冊玉寶加上皇太后尊號詔天下蠲逋欠税課丁丑以
中書平章張律為江淞行省平章政事夏四月戊寅朔
日有食之辛巳賜進士恩榮宴於翰林院癸巳敕伊實
丹等部出征軍有後期及逃還者並斬以徇甲午諭晉
王伊遜特穆爾以先朝所賜惠州銀礦洞歸還有司庚
子太陰犯壘壁陣辛丑賜會試下第舉人七十以上從
七流官致仕六十以上府州教授餘並授山長學正後
勿援例敕諸王分地仍以流官為達嚕噶齊各位所辟

為副達魯噶齊命李孟等類集累朝條格俟成書聞奏
頒行立規運提點所秩五品置官四員廣貯庫秩七品
置官二員並隸壽福院乙巳車駕幸上都宣徽院以供
尚膳遣人獵於歸德敕以其擾民特罷之加授特進上
卿玄教大宗師張留孫開府儀同三司丙午封諸王徹
伯爾為汝寧王潭州江州建昌沅州饑發廩賑糶五月
戊申朔改給各道廉訪司銀印復立陝西諸道行御史
臺桂齊張錫沙等招戶六千勒還民籍御史中丞王毅

乞歸養親不許庚申賜公主雅克哈雅鈔千錠辛酉太
陰犯天江乙丑秦州成紀縣山移是夜疾風電雹北山
南移至夕河川次日再移平地突出土阜高者二三丈
陷沒民居遣官覈驗賑恤庚午太白晝見立海西遼東
鷹坊萬戶府隸中政院壬申諸王實都實喇費甲戌日
赤如赭加授宦者中尚卿續元暉昭文館大學士乙亥
日赤如赭是月發粟三百石賑諸王昂輝特穆爾等部
貧民奉元龍興吉安南康臨江袁州撫州江州建昌贛

州南安梅州辰州興國潭州岳州常德武昌等路南豐
州澧州等處饑發廩賑糶六月辛巳察汗諾爾諸驛乏
食給糧賑之甲申太白晝見是夜太陰犯平道乙未徙
陝西肅政廉訪司於鳳翔戊戌幽王納古爾等部困乏
給鈔俾買馬羊以濟之河決鄭州己亥置汝寧王徹伯
爾王傳官辛丑以濟寧益都亢旱汰省宿衛士芻粟癸
卯太白犯東井丙午辰星犯輿鬼緬國主遣其子脫刺
合等來貢方物秋七月戊申賜宣寧王特穆爾布哈及

其二弟鈔萬錠並玉具鞍勒幣帛庚戌增興和路治中

一員壬子增尚舍寺官六員為八員雲需總管府增同

知二員癸丑復賜晉王伊遜特穆爾惠州銀鐵洞甲寅

置諸王鄂羅木烏遜王傳官四員復陳州商水鎮為南

頓縣省兩淮屯田總管府官四員併提領所入提舉司

改扎哈齊巴勒噶遜總管府為尚供府乙卯贛州土賊

蔡五九聚眾作亂遣兵捕之敕阿蘇衛戶貧乏者給牛

種耕具於拉薩哩地屯田甲子江南湖廣道奉使溫德

亨言廉訪司公田多取民租宜復舊制從之乙丑陞崇
福院秩正二品癸酉賜衛王阿穆爾克鈔萬錠命特們
德爾總宣政院事詔諭中外是月畿內大雨溇州昌平
香河寶坻等縣水沒民田廬潭州金州永州路茶陵州
霖雨江漲沒田稼出米減價賑糴八月丙戌贛州賊蔡
五九陷汀州寧化縣僭稱王詔遣江浙行省平章張律
等率兵討之己丑車駕至自上都乙未臺臣言蔡五九
之變皆由鼎智密鼎經理田糧與郡縣橫加酷暴逼抑

至此信豐一縣撤民廬千九百區夷墓揚骨虛張頃畝
流毒居民乞罷經理及冒括田租制曰可庚子改遼陽
省泰州為泰寧府壬寅增國子生百員歲貢伴讀四員
詔江浙行省印農桑輯要萬部頒降有司遵守勸課旌
表貴州達魯噶齊桑烏遜妻托克托沁死節仍俾樹碑
任所九月丁未張律以括田逼死九人敕吏部尚書王
居仁等鞠之己酉太陰犯房甲寅日如赭辛酉太白犯
左執法壬戌蔡五九衆潰伏誅餘黨悉平敕賞軍士討

捕功並官死其事者子孫已已徙岱音倉於赤斤之地
賜諸王拜特穆爾永昌路及西涼州田租冬十月丙子
朔客星見太微垣丁丑封托和齊為威寧郡王賜金印
浩爾齊特穆爾布哈為趙國公庚辰以淮西廉訪使郭
貫為中書參知政事壬子有事於太廟給雲南廉訪司
公田乙未陞同知樞密院事特穆爾圖知樞密院事授
白雲宗主沈明仁榮祿大夫司空丁酉加授特們德爾
太師癸卯八百媳婦蠻遣使獻馴象二賜以幣帛十一

月丙午客星變為彗犯紫微垣歷軫至璧十五宿明年
二月庚寅乃減辛未以星變赦天下減免各路差稅有
差甲戌封和實拉為周王賜金印左丞相哈克繖等言
彗星之異由臣等不才所致願避賢路帝曰此朕之愆
豈卿等所致其復乃職苟政有過差勿憚於改凡可以
安民者當悉言之庶上下交修天變可弭也十二月戊
寅賜雲南行省參政汪長安虎符預軍政庚寅增置平
江路行用庫癸巳給鈔買羊馬賑北邊諸軍命省臣定

擬封贈通例俾高下適宜以聞旌表汀州寧化縣民賴
祿孫孝行

三年春正月乙巳漢陽路饑出米賑之特授實保齊巴
勒噶遜達魯噶齊托歡金紫光祿大夫太尉仍給印丙
午封前中書左丞相和拉岱爾壽國公增置晉王部斷
事官四員都水太監二員省卿一員以真定保定荐饑
禁畋獵改直沽為海津鎮辛酉陞同知樞密院事瑪魯
知院事壬戌賜上都開元寺江浙田二百頃華嚴寺百

頃賜趙王阿魯圖部鈔二萬錠二月丁丑調海口屯儲
漢軍千人隸臨清運糧萬戶府以供轉漕給鈔二千錠
戊寅命湖廣行省諭安南歸占城國主置安遠王綽哈
王傳河間濟南濱棣等處饑給糧兩月三月辛亥特授
高麗王世子王暘開府儀同三司瀋王加授將作院使
呂天麟大司徒甲寅敕蕭拜珠及陝西四川省臣各一
員護送周王之雲南置周王常侍府秩正二品設常侍
七員中尉四員諮議記室各二員置打捕鷹坊民匠總

管府設官六員斷事官八員延福司飲膳署官各六員
並隸周王常侍府辛酉陞太史院秩正二品癸亥車駕
幸上都壬申鷹坊博囉等擾民於大同拘還所奉璽書
禁天下春時畋獵夏四月癸酉朔賜皇姊大長公主鈔
五千錠幣帛二百匹河南流民羣聚渡江所過擾害命
行臺廉訪司以見貯贓鈔賑之橫州徭蠻為寇命湖廣
省發兵討捕壬午諭中書省歲給衛王阿穆爾克鈔萬
錠敕衛輝昌平守臣修殷比干唐狄仁傑祠歲時致祭

戊子陞印經提舉司為廣福監己丑陞會福院秩正二
品癸巳賜安遠王綽哈金各五百兩鈔千錠幣帛二十
匹己亥增置周王斷事官二員以淮東廉訪司僉事苗
好謙善課民農桑賜衣一襲庚子以上都留守哈喇格
爾知樞密院事陞殊祥院秩正二品命中書省與御史
臺翰林集賢院集議封增通制著為令遼陽蓋州南豐
州饑發倉賑之五月甲辰至戊申日赤如赭辛亥以江
西行省右丞相鄂齊爾為大司徒庚申以大都留守拜

特穆爾為中書平章政事陞中書右丞蕭拜珠為平章
政事左丞鄂博哈雅為右丞參政郭貫為左丞參議布
哈為參知政事庚午置甘肅儒學提舉司遼陽金銀鐵
冶提舉司秩並從五品賜諸王德勒格爾布哈等金三
百五十兩銀一千二百兩鈔三千二百錠幣帛有差潭
永寶慶桂陽澧道袁等路饑發米賑糶六月乙亥制封
孟軻父為邾國公母為邾國宣獻夫人改諸王公臣分
地郡邑同知縣丞為副達嚕噶齊中下縣及錄事司增

置副達嚕噶齊一員丙子融賓柳州徭蠻叛命湖廣行
省遣官督兵捕之丁丑敕大辟罪臨刑敢有橫加剗割
者以重罪論凡鞫囚非強盜毋加酷刑戊寅吳王圖烈
納等部乏食賑糧兩月己卯詔諭百司各勤其職毋墮
廢大政甲申給安遠王綽哈分樞密院印丁亥封綽和
爾為句容郡王丁酉賜周王從衛鈔四十萬錠河決汴
梁沒民居遼陽之蓋州饑並發糧賑之秋七月壬子命
御史大夫布呼托歡達爾罕拯治臺綱仍詔諭中外乙

卯封伊魯音特穆爾為保恩王賜金印辛酉賜普慶寺
蓋都田百七十頃丙寅復以雅克特穆爾知樞密院事
庚午發高麗女直漢軍千五百人於濱州遼河慶雲趙
州屯田八月癸酉以兵部尚書竒塔特為中書參知政
事已卯車駕至上都戊戌置織佛像工匠提調所秩
七品設官二員九月辛丑復五條河屯田以中書左丞
郭貫為集賢大學士集賢大學士王毅為中書左丞庚
戌割上都宣德府奉聖州懷來縉山二縣隸大都路改

縉山縣為龍慶州帝生是縣特命改焉癸丑太白晝見
己未冀寧晉寧路地震丙寅太白經天冬十月辛未以
江南行臺侍御史高昉為中書參知政事壬申有事於
太廟調四川軍二千人雲南軍三千人烏蒙等處屯田
置總管萬戶府秩正三品設官四員隸雲南省壬午河
南路地震甲申太白犯斗庚寅敕五臺靈鷲寺置鐵冶
提舉司乙未賜豳王納古爾部鈔四萬錠丁酉修甘州
城申禁民有父在者不得私貸人錢及鬻墓木甘州

肅州等路饑免田租十一月壬寅命監察御史監治嶺北
鈎校錢糧半歲更代大萬寧寺僧瑪爾布裕木結以所
佩國公印移文有司紊亂官政敕禁止之乙巳增集寧
砂井淨州路同知府判提控案牘各一員乙卯改舊運
糧提舉司為大都陸運提舉司新運糧提舉司為京畿
運糧提舉司澧州路安撫司為安定軍民府十二月庚
午以知樞密院事圖古勒為陝西行省左丞相壬午授
嗣漢三十九代天師張嗣成太玄輔化體仁應道大真

人主領三山符籙掌江南道教事丁亥立皇子碩迪巴
拉為皇太子兼中書令樞密使授以金寶告天地宗廟
陞同知樞密院事綽和爾知樞密院事諸王昂輝部之
食給米三千一百八十六石濟之

元史卷二十五考證

仁宗紀延祐元年夏四月丁亥敕儲青海五條河屯田粟以備賑濟 按兵志成宗元貞元年摘六衛漢軍一千名赴青海屯田大德三年以五條河併入青海原刻脫條字今據增

己丑廢真陽含光二縣入英德州 按己丑原刻誤己酉以支干推之己酉不應在壬辰前今改

二年秋七月庚戌增興和路治中一員 按原刻庚戌

訛在戊申前以五月戊申朔推之即有小建此戊申
亦是月之初二日七月初支干俱不應有庚戌日今
移改

甲寅復陳州商水鎮為南頓縣 按南頓原刻訛南屯
今據志改

欽定四庫全書蒼要卷六千四百五 史部

元史卷二十六

明翰林學士亞中大夫知制誥兼修國史宋濂等修

本紀第二十六

仁宗三

四年春正月庚子帝謂左右曰中書比奏百姓乏食宜加賑恤朕默思之民饑若此豈政有過差以致然歟向詔百司務遵世祖成憲勉力奉行輔朕不逮然嘗思之

唯省刑薄賦庶百姓各遂其生也乙卯諸王托克托駐雲南擾害軍民以昂輝代之丙辰以知樞密院事鄂勒哲為雲南行者平章政事己未給帝師寺廩食鈔萬錠壬戌冀寧路地震戊辰給諸王伊蘇額布根明安岱爾部糧三月閏月庚辰封諸王博囉為冀王丙戌以立皇太子詔天下給賜鰥寡孤獨鈔減免各路租稅有差賜諸王宗戚朝會者金三百兩銀二千五百兩鈔四萬三千九百錠辛卯封拜特穆爾為汾陽王壬辰給幽王納

古爾部鈔十二萬錠買馬汴梁揚州河南淮南重慶順慶襄陽民饑發廩賑之二月庚子賜諸王瑪魯部鈔三萬錠甲辰敕郡縣各社復置義倉戊申特授近侍諤勒哲布哈翰林侍讀學士知制誥同修國史癸亥陞泰寧府為泰寧路仍置泰寧縣乙丑陞蒙古國子監秩正三品賜銀印丙寅以諸王部值托和齊之亂百姓貧乏給鈔十六萬六千錠米萬石賑之曹州水免今年租三月丁卯朔陞靖州為路庚子給趙王阿魯圖部糧四千石

乙酉太陰犯箕辛卯車駕幸上都夏四月戊戌給安王
溫都遜布哈部軍糧三月己亥德安府旱免屯田租壬
寅加授太常禮儀院使拜珠大司徒賜趙王呵嚕圖金
五十兩銀五百兩鈔千錠割懷來縣隸龍慶州甲辰以
泰寧路隸遼陽省戊申達哈蘇寇邊吳王圖烈納等敗
之於和和賜金玉束帶黃金幣帛有差己未諸王耨埒
堯乙丑禁嶺北酒帝嘗夜坐謂侍臣曰雨暘不時奈何
蕭拜珠對曰宰相之過也帝曰卿不在中書耶拜珠惶

愧項之帝露香默禱既而大雨左右以雨衣進帝曰朕
為民祈雨何避焉翰林學士承旨和塔拉都哩默色劉
賡等譯大學衍義以進帝覽之謂羣臣曰大學衍義議
論甚嘉令翰林學士阿拉克特穆爾譯以國語五月辛
未授上都留守庫庫楚開府儀同三司大司徒壬申賜
出征諸王綽哈等金銀鈔幣有差乙亥加封大長公主
孟古台為皇姑大長公主給金印戊寅改太子衛率府
為中翊府壬午黃州高郵真州建寧等處流民羣聚抄

掠敕所在有司其傷人及盜者罪之餘給糧遣歸以翰林學士承旨齊琳特穆爾為中書平章政事中書平章額卜德呼勒為集賢大學士己丑陞中書左丞鄂博哈雅為平章政事參政奇塔特為右丞高昉為左丞參議中書省事和卓張思明竝參知政事六月乙巳太陰犯心內外監察御史四十餘人劾特們德爾姦貪不法戊申特們德爾罷以左丞相哈克繖為中書右丞相己酉額卜德呼勒復為中書平章政事壬子以工部尚書王桂

為中書參知政事安遠王綽哈趙王阿魯圖為叛王托和齊所掠各賜金銀幣帛丙辰敕諸王駙馬功臣分地仍舊制自辟達魯噶齊丁巳安南來貢戊午置冀王博囉王傅二員中尉司馬各一員都總管府秩正三品己未給嶺北行省經費鈔九十萬錠雜絲五萬匹癸亥禁總攝沈明仁所佩司空印毋移文有司秋七月乙亥李孟罷以江浙行省左丞王毅為中書平章政事庚辰賜皇姑大長公主孟古台金百兩銀千兩鈔二千錠幣帛

各百匹賞討叛王有功句容郡王綽和爾等金銀幣帛
鈔各有差壬午敕齊琳特穆爾碩魯諸王駙馬及賑濟
所部貧乏特授中衛親軍都指揮使布呼齊太尉己丑
成紀縣山崩土石潰徙壞田稼廬舍壓死居民辛卯冀
寧路地震帝諭首臣曰比聞蒙古諸部因乏往往鬻子
女於民家為婢僕其命有司贖之還各部帝出見衛士
有敝衣者駐馬問之對曰戍守邊鎮餘十五年以故負
耳帝曰此輩久勞於外留守臣未嘗以聞非朕親見何

由知之自今有類此者必言於朕因命賜之錢帛八月
丙申車駕至自上都勞惑犯輿鬼壬子太陰犯昴庚申
哈克繖奏事畢帝曰卿等日所行何事哈克繖對曰臣
等第奉行詔旨而已帝曰卿等何嘗奉行雖祖宗遺訓
朝廷法令皆不遵守夫法者所以辨上下定民志自古
未有法不立而天下治者使人君制法宰相能守而勿
失則下民知所畏避綱紀可正風俗可厚其或法弛民
慢怨言竝興欲求治安豈不難哉九月丙寅哈克繖言

故事丞相必用蒙古勲臣哈克繖回回人不厭人望遂
懇辭制以宣徽博迪蘇為中書右丞相哈克繖為左丞
相己巳大都南城產嘉禾一莖十一穗庚午太陰犯斗
壬辰詔戒飭海漕諭諸司毋得沮撓嶺北地震三日冬
十月甲午朔有事於太廟戊戌給諸王鴻和特穆爾等
部糧五千石壬寅敕刑部尚書奇哩巴監大都兵馬司
防遏盜賊仍嚴飭軍校制其出入遣御史大夫布呼參
知政事王桂祭陝西嶽鎮名山賑恤秦州被災之民己

酉監察御史言官吏丁憂起復人情驚惑請禁止以絕
僥倖惟朝廷者舊特旨起復者不在禁例制曰可給兩
淮屯田總管府職田壬子給鈔五萬錠糧五萬石賑察
汗諾爾戊午海外婆羅公之民往賈海番遇風濤存者
十四人漂至温州永嘉縣敕江浙省資遣還鄉改潮州
路所統梅州隸廣東道宣慰司十一月己卯復浚揚州
運河己丑併沂源縣入隴州壬辰諭諸宿衛入直各居
其次非有旨不得上殿闈入禁中者坐罪大臣許從二

人他官一人門者譏其出入十二月丁酉復廣州採金銀珠子都提舉司秩正四品官三員乙巳置詹事院從一品太子詹事四員副詹事詹事丞竝二員家令府延慶司設官竝四員典寶監八員遣官即興和路及淨州發廩賑給北方流民己酉盧溝橋澤畔店瑠璃河竝置巡檢司壬子置安王王傅丁巳賜諸王圖們特穆爾等及駙馬呼嚕古岱各部金一千二百兩銀七千七百兩鈔一萬七千七百錠幣帛二千匹以內宰領廷福司事

圖們岱爾知樞密院事特授晉王內史阿勒坦綽克金
紫光祿大夫魯國公辛酉改齊哩克昆民匠總管府為
繕用司

五年春正月辛未賜諸王圖們特穆爾等所部鈔四萬
錠甲戌懿州地震丙子安南國遣其臣尹世才等以方
物來貢乙酉敕諸王位下民在大都者與民均役丁亥
會試進士湖廣平章邁珠加魯國公大司農賑晉王伊
蘇特爾穆等部貧乏者二月癸巳朔日有食之和寧路

地震丁酉敕廣寧開元等萬戶府軍入侍衛有兄弟子
姪五人者三人留四人三人者二人留著為籍秦州秦
安縣山崩封諸王鴻和特穆爾為嘉王圖們特穆爾為
武平王竝賜印丁未敕雲南四川歸還所侵順元宣撫
司民地戊申陞內史府秩正二品建盞頂殿於文德殿
後辛亥敕杭州守臣春秋祭淮安忠武王巴延祠王子
諸王達實密部乏食敕甘肅行省給糧賑之賜諸王察
球爾鈔萬錠甲寅置寧昌府乙卯命中書省汰不急之

役增置河東宣慰司副使一員敕上都諸寺權豪商販
貨物竝輸稅課戊午以扎蘭齊喇萬戶府為右衛率府
給書西天字維摩經金三千兩庚申罷封贈賞討叛王
托和齊戰功賜諸王部察罕等金銀幣鈔有差三月戊
辰御試進士賜呼圖克岱爾霍希賢以下五十人及第出
身有差己巳賜寧海王巴圖爾金印庚午立諸王鄂羅
木烏遜部打捕鷹坊諸色人匠齊哩克昆總管府秩從
四品改靜安路為德寧路靜安縣為德寧縣癸酉晉王

伊蘇特穆爾部貧乏賑米四千一百五十石賜鈔二萬錠買牛羊孳畜乙亥增給兩淮運司分司印一授安遠王綽哈開府儀同三司錄軍國重事知樞密院事戊寅以湖州路為安王溫都遜布哈分地其戶數視魏王阿穆爾克癸未知寧淨州路禁酒賜鈔萬錠命晉王伊蘇特穆爾賑遼東貧民晉王內史實德哩加榮祿大夫封桓國公給金九百兩銀百五十兩書金字藏經甲申免鞏昌等處經賑濟者差稅鹽課乙酉御史臺臣言諸司

近侍隔越中書聞奏者請如舊制論罪制曰可己丑敕

以紅城屯田米賑淨州平地等處流民置汾陽王拜特

穆爾王傳四員賜超爾達爾罕平江路田百頃夏四月

壬辰安吉王竒塔特布濟克堯丁酉諸王昂吉爾部乏

食賑米三千石己亥耽羅捕獵戶成金等為寇敕征東

行省督兵捕之庚子賜諸王察球爾部鈔萬錠布帛稱

是給中翊府閭臺順州屯田鈔萬錠置牛種農具庚戌

敕安遠王綽哈分地隸建寧者七縣汀州者三縣達嚕

噶齊聽其自辟陞印經提舉司為延福監秩正三品分
汰各部流民給糧賑濟免懷孟河南南陽居民所輸陝
西鹽課是時解州鹽池為水所壞命懷孟等處食陝西
紅鹽復以地遠改食滄鹽而仍輸課陝西民不堪命故
免之摩琳特爾格驛困乏濟以馬五千匹遼陽饑海漕
糧十萬石於義錦州以賑貧民甲寅樞密院臣言各省
調度軍馬惟長官二人領其事今四川省諸臣皆預非
便請如舊制從之以齊諾史弼竝為中書平章政事侍

御史敬儼為中書參知政事戊午車駕幸上都五月辛酉朔順元等處軍民宣撫使阿晝以洞蠻酋黑冲子子昌奉方物來覲丁卯賜安王溫都遜布哈金五十兩銀五千兩以御史中丞伊拉齊為中書右丞相戊辰遣平章政事王毅崇星於司天臺三晝夜諸王諳達穆爾巴延特穆爾部乏食賑糧兩月壬申監察御史言比年名爵冒濫太尉司徒國公接跡於朝昔奉詔裁罷中外莫不欣悅近聞禮部奉旨鑄太尉司徒司空等印二十有六

此輩無功於國載在史冊貽笑將來請自今門閥貴重
勲業昭著者存留一二餘竝革去制曰可癸酉遣官分
道減決筭以下罪已卯德慶路地震鞏昌隴西縣大雨
南土山崩壓死居民給糧賑之六月辛卯御史臺臣言
昔遣張律等經理江浙江西河南田糧虛增糧數流毒
生民已嘗奉旨俟三年徵租今及其期若江浙江西當
如例輸之其河南請視鄉例減半徵之制曰可癸巳以
典瑞院使鄂齊爾為集賢大學士領典瑞院事大司徒

已亥北地諸部軍士乏食給糧賑之庚子遣烏訥爾巴圖爾濟魯海分汰淨州北地流民其隸四宿衛及諸王駙馬者給糧遣還癸卯賜諸王僧格巴勒金束帶一銀百兩鈔五百錠乙巳術者趙子玉等伏誅時魏王阿穆爾克以罪貶高麗子玉言於王府司馬曹圖卜台等曰阿穆爾克名應圖識於是潛謀備兵器衣甲旗鼓航海往高麗取阿穆爾克至大都俟時而發行次利津事覺誅之西番土寇作亂敕甘肅省調兵捕之丁巳賜安王

溫都遜布哈等金束帶及金二百兩銀一千五十兩鈔

二千二百錠幣帛二百八十匹秋七月己未朔李邦寧

加開府儀同三司癸亥賜諸王巴爾岱等金二百兩銀

八百五十兩鈔二千錠幣帛二百匹甲子給欽察衛馬

羊價鈔一十四萬五千九百九十二錠丙寅調軍五千

烏蒙等處屯田置總管萬戶府秩正三品給銀印丁卯

給鈔二十萬錠糧萬石命晉王分賚所部宿衛士壬申

御史中丞趙簡言皇太子春秋鼎盛宜選耆儒敷陳道

義今李銓侍東宮說書未諳經史請別求碩學分進講
讀實宗社無疆之福從之諸王布琳尼敦之叛諸王伊
實錫里濟及衛士托迪巴圖坐持兩端不助官軍進討
敕流伊實江西錫里濟湖廣托迪衡州巴圖潭州癸酉
拘衛王阿穆爾克王傳印置籛廩司秩正八品隸上都
留守司豐州石泉店置巡檢司賜諸王巴克實特穆爾
等金銀并賑其部米萬石鈔萬錠已卯諸王昂吉爾岱
庫春特穆爾來朝賜金二百兩銀一千兩鈔五千錠幣

帛一百匹仍給鈔萬錠米萬石分賚所部辛巳立受給
庫秩九品隸工部壬午罷河南省左丞陳英等所括民
田止如舊例輸稅戊子鞏昌路寧遠縣山崩加封楚三
閭大夫屈原為忠節清烈公八月庚子車駕至自上都
乙卯併翁源縣入曲江縣九月癸亥大司農邁珠等進
司農丞苗好謙所撰栽桑圖說帝曰農桑衣食之本此
圖甚善命刊印千帙散之民間丙寅廣西兩江龍州萬
戶趙清臣太平路總管李興隆率土官黃法扶何凱竝

以方物來貢賜以幣帛有差齒王納古爾等部貧乏命
甘肅省市馬萬匹給之丁卯中書右丞宣徽使伊拉齊
為中書平章政事左丞高昉為右丞參知政事和卓為
左丞吏部尚書音扎噶為參知政事壬申以鈔給北邊
軍為馬價甲戌以作佛事釋重囚三人輕囚五十三人
己卯以江浙省所印大學衍義五十部賜朝臣辛巳置
大永福寺都總管府秩三品壬午敕軍官犯罪行省咨
樞密院議擬毋擅決遣丙戌以僉太常禮儀院事果勒

為中書參知政事丁亥立行宣政院於杭州設官八員
大同路金城縣大雨雹冬十月己丑以大寧路隸遼陽
省宣德府隸大都路敕僧人除宗舊有及朝廷撥賜土
田免租稅餘田與民一體科徵播州南寧長官洛麼作
亂思州守臣和濟格爾招諭之洛麼遣人以方物來覲
罷膠萊莒密鹽使司復立濤洛場辛卯禁大同冀寧晉
寧等路釀酒壬辰建帝師帕克斯巴殿於大興教寺給
鈔萬錠癸巳改中翊府為羽林親軍都指揮使司甲午

有事於太廟癸丑贛州路雩都縣里胥劉景周以有司
徵括田新租作亂敕免徵新租招諭之十一月辛酉開
成莊浪等處禁酒壬戌改黃花嶺屯儲軍民總管府為
屯儲總管府設官四員山後民饑增海漕四十萬石增
置大都南北兩兵馬司指揮使色目漢人各二員給分
司印二丁卯用監察御史奈曼岱等言追奪建康富民
王訓等白身濫受宣敕仍禁冒籍貫宿衛及巧受遠方
職官不赴任求別調者隱匿不自首者罪之己巳陞同

知樞密院事忠嘉知樞密院事丙子集賢大學士太保

庫春言唐陸淳著春秋纂例辨疑微旨三書有益後學

請令江西行省鋟梓以廣其傳從之癸未敕江西茶運

司歲課以二十五萬錠為額敕大永福寺創殿安奉順

宗皇帝御容十二月壬辰特授集賢大學士圖烈大司

徒辛亥置重慶路江津巴縣等處屯田省成都歲漕萬

二千石甲寅敕樞密院覈實蒙古軍貧乏者存恤五年

六年春正月丁巳朔暹國遣使奉表來貢方物丁卯敕

福建兩廣雲南甘肅四川軍官致仕還家官給驛傳如
民官例戊辰賑晉王部貧民癸酉特授同知徽政院事
趙爾達爾罕金紫光祿大夫太尉給銀印甲戌監察御
史富珠哩紳等言皇太子位正東宮既立詹事院以總
家政宜擇年德老成道義崇重者為師保賓贊俾盡心
輔導以廣緝熙之學制曰可戊寅太陰犯心己卯崇星
於司天臺廣東南恩新州徭賊龍郎庚等為寇命江西
行省發兵捕之帝御嘉禧殿謂扎爾古齊瑪魯曰扎爾

古齊人命所繫其詳閱獄辭事無大小必謀諸同僚疑不能決者與省臺臣集議以聞又顧謂侍臣曰卿等以朕居帝位為安邪朕惟太祖創業艱難世祖混一疆宇兢業守成恒懼不能當天心繩祖武使萬方百姓樂得其所朕念慮在茲卿等固不知也二月丁亥朔日有食之改釋奠於中丁祀社稷於中戊禋星於回回司天臺丁酉雲南闍里愛俄永昌蒲蠻阿八刺等竝為寇命雲南省從宜勦捕戊戌改陝西轉運鹽使司為河東陝西

都轉運鹽使司直隸省部己亥太陰犯靈臺乙巳敕諸

司不由中書奏官輒署事者悉罷之特授僧從吉祥榮

祿大夫大司空加榮祿大夫大司徒僧文吉祥開府儀

同三司三月丁巳以天壽節釋重囚一人己未給鈔賑

濟上都西番諸驛辛酉鄂端地有叛者入寇遣鎮西武

靖王吹巴勒率兵討之詔以御史中丞托克托呼為御

史大夫諭曰御史大夫職任至重以卿勲舊之裔故特

授汝當思乃祖乃父忠勤王室仍以古名臣為法否則

將陞汝家聲負朕委任之意矣丙寅改懷孟路為懷慶
路特授翰林學士承旨巴爾斯布哈開府儀同三司大
司徒己巳太陰犯明堂敕諸王駙馬宗姻諸事依舊制
領於內八府官勿徑移文中書封諸王伊魯特穆爾為
恩王給印置王傳官免大都上都興和大同今歲租稅
癸酉太陰犯日星甲戌太陰犯心壬午賜大興教寺僧
齋食鈔二萬錠禁甘肅行省所屬郡縣釀酒夏四月壬
辰中書省臣言雲南土官病故子侄兄弟襲之無則妻

承夫職遠方蠻夷頑獷難制必任土人可以集事今或
闕員宜從本俗權職以行制曰可丙申命京師諸司官
吏運糧輸上都興和賑濟蒙古饑民庚子車駕幸上都
以特們德爾為太子太師內外監察御史四十餘人劾
其逞私蠹政難居師保之任不聽諸王格藏薨丙午命
宣政院賑給西番諸驛壬子巴延特穆爾部貧乏給鈔
賑之五月辛酉太陰犯靈臺丁卯太陰犯房丙子太陰
犯壘壁陣加安南國王陳益稷儀同三司六月戊子以

莊浪巡檢司為莊浪縣移巡檢司於北卜渡癸巳以米五千石賑大長公主所隸貧民甲午改繕珍司為徽儀使司秩正二品己亥歲星犯東咸辛丑置河南田賦總管府隸內史府設達嚕噶齊總管同知各一員副總管二員秩從三品戊申置勇校署以角觝者隸之庚戌大同雨雹大如鷄卵詔以馳馬牛羊分給朔方蒙古民戌守邊徼者俾牧養蕃息以自贍仍命議興屯田壬子賜大乾元寺鈔萬錠俾營子錢供繕修之費仍陞其提點

所為總管府給銀印秩正三品給鈔四十萬錠賑哈喇
齊部貧民三十萬錠賑諸位齊哩克昆被災者諸有俸
及能自贍者勿給癸丑以羽林親軍萬人隸東宮丙子
陞廣惠司秩正三品掌回回醫藥丁丑以濟寧等路水
遣官閱視其民乏食者賑之仍禁酒開河泊禁聽民採
食晉陽西涼鈞等州陽翟新鄭密等縣大雨雹汴梁益
都般陽濟南東昌東平濟寧恭安高唐濮州淮安諸處
大水秋七月丙辰緬國趙欽撒以方物來覲來安路總

管岑世興叛據唐興州賜璽書招諭之諸王庫庫沁部
貧乏給糧賑之壬戌太陰犯心以扎蘭齊喇萬戶府軍
萬人隸東宮置右衛率府秩正三品丁卯詔諭江西官
吏豪民毋沮撓茶課甲戌皇姊大長公主僧格喇實作
佛事釋全寧府重囚二十七人敕按問全寧守臣阿總
不法仍追所釋囚還獄命分簡紐爾部流囚罪稍輕者
屯田肇州乙亥通州鄭州增置三倉丙子太白犯太微
垣右執法增置上都巡警院開平縣官各二員己卯晉

王伊蘇特穆爾所部民經剽掠災傷為盜者衆敕扎爾古齊囊嘉特往與晉王內史審錄罪囚重者就啓晉王誅之當流配者加等杖之庚辰賜摩琳摩該兩驛鈔一萬二千一百二十錠俾市馬給驛辛巳賜左右鷹坊及哈喇齊等貧乏者鈔一十四萬錠八月甲申以河東山西道宣慰使張思明為中書參知政事乙酉熒惑犯輿鬼甲午以授皇太子玉冊告祭於南郊庚子車駕至自上都丁未告祭於太廟是月伏羌縣山崩閏八月丙

辰辰星犯太微垣右執法賜嘉王鴻和特穆爾部羊十萬馬萬匹庚申增置興和路預備倉秩正八品陞廣益庫從八品癸亥熒惑犯軒轅甲子太陰犯壘壁陣浚會通河壬申以太傅御史大夫布呼為太師癸酉敕河東山西道宣慰司官給俸同隨朝敕諸司有受命不之官及避繁劇託故去職者奪其宣敕乙亥太白犯東咸併永興縣入奉聖州九月甲申以徽政使托迪為太傅陞參議中書省事竒徹為參知政事辛卯特爾格等二十

八驛被災給鈔賑之壬辰崇星於司天臺癸巳以作佛
事釋大辟囚七人流以下囚六人戊戌增海漕十萬石
置雲南縣隸雲內州以故昌州寶山縣置寶昌州隸興
和路庚子併順德廣平兩鐵冶提舉司為順德廣平彰
德等處鐵冶提舉司癸卯御史臺臣言比者官以倖求
罪以賂免乞凡內外官非勲舊有資望者不許驟陞諸
犯贓罪已款伏及當鞠而幸免者悉付元問官以竟其
罪其貪污受刑奪職不敘者魚緣近侍出入內庭覲倖

名爵宜斥逐之帝皆納其言詔四宿衛嘗受刑者勿令
造禁廷山東諸路禁酒浚鎮江練湖發粟賑濟寧東平
東昌高唐德州濟南益都般陽揚州等路饑民十月甲
寅省都功德使四員止存六員乙卯東平濟寧路水陸
十五驛乏食戶給麥十石中書省臣言白雲宗總攝沈
明仁強奪民田二萬頃誑誘愚俗十萬人私賂近侍妄
受名爵已奉旨追奪請汰其徒還所奪民田其諸不法
事宜令覈問有旨朕知沈明仁姦惡其嚴鞠之戊午遣

中書右丞相博迪蘇持節授皇太子玉冊辛酉以扎爾
古齊特穆爾布哈為御史大夫癸亥熒惑犯太微垣左
執法上都民饑發官粟萬石減價賑糶置兩浙鹽倉六
所秩從八品官二員惟杭州嘉興二倉設官三員秩從
七品鹽場三十四所場設監運一員正八品罷檢校所
乙丑太陰犯昴丁卯賑北方諸驛戊辰太陰犯東井庚
午太白晝見辛未太陰犯軒轅丙子以皇太子受玉冊
詔天下已卯浚通惠河增河東陝西鹽運司判官一員

給分司印二置提領所二秩從八品官各二員鹽場二
增管勾各二員罷漉鹽戶提領二十人濟南濱棣州章
邱等縣水免其田租十一月辛卯熒惑犯進賢木邦路
帶邦為寇敕雲南省招捕之乙巳以秘書卿沙木思鼎
為大司徒庚子敕晉王部貧民二千居青海屯田增京
畿漕運司同知副使各一員給分司印中書省臣言曩
賜諸王阿濟格鈔三萬錠使營子錢以給畋獵廩膳毋
取諸民今其部阿勒呼木等出獵恣索於民且為姦事宜

令宗正府刑部訊鞫之以正典刑制曰可禁民匿蒙古
軍亡奴帝諭臺臣曰國家以民為本比間百姓疾苦銜
冤者衆其令監察御史廉訪司審察以聞河間民饑發
粟賑之十二月壬戌命皇太子參決國政封宗儒周惇
頤為道國公甲子遣宗正府扎爾古齊二員審決興和
平地等處獄囚省雲南大理大小徹里等地同知相副
官及儒學蒙古教授等官百二十四員丙寅太陰犯軒
轅己巳復吏人出身舊制其犯贓者止從七品免大都

上都興和延祐七年差稅河西塔喇地制屯田立軍
民萬戶府壬申太陰犯星平章政事王毅以親老辭職
從之仍賜其父幣帛癸酉是夜風雪甚寒帝謂侍臣曰
朕與卿等居暖室宗戚昆弟遠戍邊陲曷勝其苦歲賜
錢帛可不徧及耶敕上都大都冬夏設食於路以食饑
者

七年春正月辛巳朔日有食之帝齋居損膳輟朝賀壬
午御史臺臣言比賜布爾罕丹山場諤勒哲布哈海船

稅會計其鈔皆數十萬錠諸王軍民貧者所賜未嘗若是苟不撙節漸致帑藏虛竭民益困矣中書省臣進曰臺臣所言良是若非振理朝綱法度愈壞臣等乞賜罷黜選任賢者帝曰卿等不必言其各共乃事癸未帝御大明殿受諸王百官朝賀辛卯江浙行省丞相赫魯言白雲僧沈明仁擅度僧四千八百餘人獲鈔四萬餘錠既已辭伏今遣其徒沈崇勝潛赴京師行賄求援請逮赴江浙併治其罪從之乙未太陰犯明堂上星丁酉帝

不豫辛丑帝崩於光天宮壽三十有六在位十年癸卯
葬起輦谷從諸帝陵五月乙未羣臣上諡曰聖文欽孝
皇帝廟號仁宗國語曰布延圖皇帝仁宗天性慈孝聰
明恭儉通達儒術妙悟釋典嘗曰明心見性佛教為深
修身治國儒道為切又曰儒者可尚以能維持三綱五
常之道也平居服御質素澹然無欲不事遊畋不喜征
伐不崇貨利事皇太后終身不違顏色待宗戚勲舊始
終以禮大臣親老時加恩賚太官進膳必分賜貴近有

司奏大辟每慘惻移時其孜孜為治一遵世祖之成憲
云

元史卷二十六

元史卷二十六考證

延祐四年夏四月甲辰以秦寧路隸遼陽省 按秦寧

原刻訛太寧今與上文畫一改

五月戊寅改太子衛率府為中府翊府 按原刻無太

子二字今據百官志改

五年八月庚子車駕至上都 按庚子原刻作戊子

兩戊子連見又分繫兩月必有一誤考之宋元通鑑
則是年至上都在八月庚子今據改

六年三月己未給鈔賑濟上都西番諸驛 按己未原

刻訛乙未以支干推之丁巳下辛酉上不應有乙未

日今改

六月晉陽西涼鈞等州陽翟新鄭密等縣大雨雹 按

陽翟原刻訛楊翟今據地理志改

九月詔四宿衛嘗受刑者勿令造禁廷 按元制有四

集賽宿直宮禁所云四宿衛當即指此詔字下原刻

衍謂字今據文義刪

欽定四庫全書薈要卷六千四百六史部

元史卷二十七

明翰林學士亞中大夫知制誥兼修國史宋濂等修

本紀第二十七

英宗一

英宗睿聖文孝皇帝諱碩迪巴拉仁宗嫡子也母莊懿
慈聖皇后鴻吉哩氏以大德七年二月甲子生仁宗欲
立為太子帝入謁太后固辭曰臣幼無能且有兄在宜

立兄以臣輔之太后不許延祐三年十二月丁亥立為
皇太子授金寶開府置官屬監察御史段輔太子詹事
郭貫等首請近賢人擇師傅帝嘉納之六年十月戊午
受玉冊詔命百司庶務必先啓太子然後奏聞帝謂中
書省臣曰至尊委我以天下事日夜寅畏惟恐弗堪卿
等亦當洗心滌慮恪勤乃職勿有隳壞以貽君父憂七
年春正月戊戌仁宗不豫帝憂形于色夜則焚香泣曰
至尊以仁慈御天下庶績順成四海清晏今天降大厲

不如罰殛我身使至尊永為民主辛丑仁宗崩帝哀毀
過禮素服寢于地日齋一粥癸卯太陰犯斗甲辰太子
太師特們德爾以太后命為右丞相丙午遣使分讞內
外刑獄戊申賑通遼二州蒙古貧民汰知樞密院事四
員禁巫祝日者交通宗戚大官二月壬子罷造永福寺
賑大同豐州諸驛饑以江浙行省左丞相赫魯為中書
平章政事丁巳修佛事戊午祭社稷建御容殿于永福
寺汰富民竄名宿衛者給役蒙古諸驛己未命儲糧于

宣德開平和琳諸倉以備賑貸供億復以都水監隸中

書辛酉太陰犯軒轅御女平章政事齊琳特穆爾御史

大夫托歡罷為集賢大學士壬戌太陰犯靈臺甲子特

們德爾阿薩爾請捕逮四川行省平章政事趙世延赴

京參議中書省事青沙津坐鬻官以法當杖太后命笞

之帝曰不可法者天下之公若徇私而輕重之非示天

下以公也卒正其罪丙寅以陝西行省平章政事趙世

榮為中書平章政事江西行省右丞茂巴爾為中書右

丞參知政事張思明為中書左丞中書左丞和卓罷為
嶺北行省右丞丁卯太陰犯日星白雲宗攝沈明仁為
不法坐罪詔籍江南冒為白雲僧者為民己巳修辰類
佛事于京城四門罷上都乾元寺規運總管府庚午太
陰犯斗辛未括民間係官山場河泊窰冶廬舍壬申召
陝西行臺御史大夫達實特穆爾赴闕以遼陽大同上
都甘肅官牧羊馬牛駝給朔方民戶仍給曠地屯種癸
酉括勘崇祥院地其冒以官地獻者追其直以民地獻

歸其主決開平重囚丙子定京城環衛更番法法准五

衛漢軍歲例丁丑奪前中書平章政事李孟所受秦國

公命仍仆其先墓碑戊寅中書平章政事額卜德呼勒

罷為甘肅行省平章政事阿爾哈雅罷為湖廣行省平

章政事特們德爾以前御史中丞楊多爾濟中書平章

政事蕭拜珠違太后旨矯命殺之籍其家徵政院使實

勒們以太后命請更朝官帝曰此豈除官時耶且先帝

舊臣豈宜輕動俟予即位議于宗親元老賢者任之邪

者黜之可也司農卿鄂勒哲布哈言先帝以土田頒賜諸臣者宜悉歸之帝曰所賜為誰對曰左丞相阿薩爾所得為多帝曰予常諭卿等當以公心輔弼卿於先朝嘗請海舶之稅以阿薩爾奏而止今所言乃復私憾非公議也豈輔弼之道耶遂出鄂勒哲布哈為湖南宣慰使奪僧年扎克策喇實等所受司徒國公制銷其印三月辛巳以中書禮部領教坊司壬午賑陳州嘉定州饑瓜哇遣使入貢戊子太陰犯酒旗上星熒惑犯進賢徵

諸王駙馬流竄者給侍從遣就分邑庚寅帝即位詔曰
洪惟太祖皇帝膺期撫運肇開帝業世祖皇帝神機睿
畧統一四海以聖繼聖迨我先皇帝至仁厚德溷濡羣
生君臨萬國十年于茲以社稷之遠圖定天下之大本
叶謀宗親授予冊寶方春宮之與政遽昭考之賓天諸
王貴戚元勳碩輔咸謂朕宜體先帝付托之重皇太后
擁護之慈既深繫於人心詎可虛于神器合辭勸進誠
意交孚乃于三月十一日即皇帝位于大明殿可赦天

下尊太后為太皇太后是夜太陰犯明堂壬辰太皇太后受百官朝賀于興聖宮特們德爾進開府儀同三司上柱國太師敕羣臣超授散官者朝會毋越班次賜諸王伊遜特穆爾托克托納延等金銀幣帛有差賑寧夏路軍民饑甲午作佛事于寶慈殿賑摩琳溫都爾等十一驛饑乙未日暈若連環丙申俄羅斯等內附賜鈔萬四千貫遣還其部遣知樞密事額爾吉納檢覈鞏昌等路屯戍選甘州戍卒戍汰上都留守司留守五員定

吏員秩止從七品如前制庚子降太常禮儀院通政院
都護府崇福司竝從二品蒙古國子監都水監尚乘寺
光祿寺竝從三品給事中拉木伊克監尚舍寺司天監
竝正四品其官遞降一等有差七品以下不降賜邊戍
諸王附馬及將校士卒金幣有差市羊五十萬馬十萬
贍北邊貧乏者辛丑禁擅奏壘書以樞密院兼領左右
衛率府壬寅降前中書平章政事李孟為集賢侍講學
士悉奪前所受制命御史臺臣請降詔諭百司以肅臺

網帝曰卿等但守職盡言善則朕當服行否亦不汝罪也甲辰詔中外毋沮議特們德爾敕罷醫卜工匠任子其藝精絕者擇用之丙午有事於南郊告即位丁未罷崇祥院以民匠都總管府隸將作院夏四月庚戌有事於太廟告即位追奪佛遜司徒官罷少府監復儀鳳教坊廣惠諸司品秩罷行中書省丞相河南行省丞相額森特穆爾湖廣行省丞相多爾濟德沁遼陽行省丞相竝降為本省平章政事惟征東行省丞相高麗王不降賜

諸王特穆爾布哈鈔萬五千貫甲寅太白犯填星乙卯

復國子監都水監秩正三品罷回回國子監行通政院封諸

王齊齊克圖為寧遠王詔京師勢家與民均役諾海溫都

爾驛戶饑賑之戊午祀社稷告即位己未紹慶路洞蠻

為寇命四川行省捕之祭遁甲神于香山命平章政事

王毅等徵理在京諸倉庫糧帛虧額申嚴和琳酒禁庚

申降百官越階者竝依所受之職以太常禮儀院使拜珠

為中書平章政事以西僧雅布達勒為元水延教三藏

法師授金印壬戌太陰犯房以即位賞宿衛軍括馬三萬疋給蒙古流民遣還其部給通遼二州蒙古戶夏布特們德爾請參決政務禁諸臣毋隔越擅奏從之乙丑仁宗喪卒哭作佛事七日戊辰車駕幸上都海運至直沽調兵千人防戍封王煦為鷄林郡公議祔仁宗以陰陽拘忌權結綵殿於太室東南以奉神主己巳河間真定濟南等處蒙古軍饑賑之罷市船司禁賈人下番課回回散居郡縣者戶歲輸包銀二兩增兩淮荆湖江南

東西道田賦斗加二升賑大都淨州等處流民給糧馬
遣還北邊戊寅以蒙古漢人驛傳復隸通政院有獻七
寶帶者因近臣以進帝曰朕登大位不聞卿等薦賢而
為人進帶是以利誘朕也其還之是月左衛屯田旱蝗左
翊屯田蟲食麥苗亳州水五月己卯禁僧馳驛仍收元
給璽書庚辰上都留守賀巴延坐便服迎詔棄市籍其
家辛巳汝寧府霖雨傷麥禾發粟五千石賑糶之丁亥
罷沅陵縣浦口千戶所己丑中書省臣請禁擅奏除拜

帝曰然恐朕遺忘或乘間奏請濫賜名爵汝等當復以

聞復置青海五條河屯田命僧禱雨大同雲內豐勝諸

郡縣饑發粟萬三千石貸之左丞相阿薩爾罷為嶺北

行省平章政事拜珠為中書左丞相鼎喇古塔斯哈雅

竝為中書平章政事濟爾噶朗為中書參知政事庚寅

太陰犯心辛卯參知政事竒徹罷為集賢學士賑上都

城門及駐冬衛士遣使推廣東番貸弛陝西酒禁壬辰

和琳民間海陸殍死者三千餘人旌其門癸巳太陰犯

天狗甲午瀋陽饑給鈔萬二千五百貫賑之乙未請大
行皇帝諡于南郊丙申太白犯畢禁宗戚權貴避徭役
及作奸犯科戊戌有告嶺北行省平章政事阿薩爾中
書平章政事赫魯及御史大夫圖塔哈徽政使實勒們
等與故約蘇穆爾妻伊埒薩巴謀廢立拜珠請鞫狀帝
曰彼若借太皇太后為詞柰何命悉誅之籍其家追封
隴西公汪世顯為隴右王辛丑以知樞密院事特穆爾
圖為中書平章政事壬寅監察御史請罷僧道工伶濫

爵及建寺豢獸之費甲辰以誅阿薩爾赫嚕賀巴延等
詔天下敕百司日勤政務怠者罪之丙午御史劉恒請
興義倉及奪僧道官敕捕伊埒薩巴子江浙行省平章
政事瑪魯仍籍其家丁未封旺沁為雲南王往鎮其地
番陽進嘉禾一莖六穗以賀巴延實勒們阿薩爾家貧
田宅賜特們德爾等六月己酉流徽政院使穆蘇穆爾
于金剛山以圖塔哈實勒們故奪人畜產歸其主甲寅
前太子詹事綽和爾伏誅京師疫修佛事于萬壽山乙

卯昌王阿實克部饑賜鈔千萬貫賑之賞誅阿薩爾等
功賜拜珠等金銀鈔有差丙辰召河南行省平章政事
額森特穆爾至京收圖塔哈廣平王印丁巳以江西行
省左丞相托克托為御史大夫宗正扎爾古齊特穆爾
布哈知樞密院事戊午罷徽政院廣東採珠提舉司罷
以有司領其事封知樞密院事達實特穆爾為薊國公
己未定邊地盜孽畜罪犯者令給各部力役如不悛斷
罪如內地法庚申太陰犯斗賜角觝百二十人鈔各千

貫辛酉免僧人雜役壬戌敕諸使至京者大事五日小
事三日遣還是夜月食既癸亥太陰犯壘壁陣乙丑賑
北邊饑民有妻子者鈔千五百貫孤獨者七百五十貫
新作太祖幄殿西番道喇各目降丁卯太白犯井賜諸
王阿穆爾台宴服珠帽戊辰賑雷家驛戶鈔萬五千貫
辛未太陰犯昴甲戌賜北邊諸王巴雅爾台等十人鈔
各二萬五千貫邊民賑米三月修寧夏竒徹勒佛事給
鈔二百一十二萬貫丁丑改紅城中都威衛為忠翊侍

衛親軍都指揮使司隸樞密院罷章慶司延福司羣牧
監宮正司遼陽萬戶府復徽儀司為繕珍司善政司為
都總官府內宰司延慶司甄用監復為正三品益都蝗
荆門州旱棣州高郵江陵水秋七月戊寅賜諸王竒爾
布哈鈔萬五千貫命玄教宗師張留孫修醮事于崇真
宮壬午立普定路屯田分烏撒烏蒙屯田卒二千赴之
運和琳糧于扎昆倉以便邊軍市馬三萬羊四萬給邊
軍貧乏者癸未括馬於大同興和冀寧三路以頒衛士

甲申車駕將北幸調左右翊軍赴北邊浚井以知樞密院事瑪嚕哈坦竝為遼陽行省平章政事丙戌賜諸王邁努等鈔二十五萬貫丁亥太陰犯斗諸王噶珠等部火賑糧三月鈔萬五千貫晉王伊遜特穆爾部饑賑鈔五千萬貫壬辰罷女直萬戶府及狗站托克托和斯散遼陽紅花萬戶府兵遣扈從諸營還大都禁踐民禾安南內附人陳巖言其國貢使多為覘伺敕湖廣行省汰遣之乙未賜西僧沙克嘉鈔萬五千貫以甘肅行省平

章竒徹知樞密院事回回太醫進藥曰達爾嘉給鈔十
五萬貫丙申以昌平灤陽十二驛供億繁重給鈔三十
萬貫中書平章政事鼎喇古罷降封安王溫都遜布哈
為順陽王禁獻珍寶製袞冕戎戎勞惑犯房樞密院臣
言塔海萬戶部布拉噶齊與北兵戰拔衆軍士以還棄
其子於野殺所乘馬以啗士卒請賞之賜鈔五千貫鄂
蘭徹辰告諸王阿爾婁特穆爾謀變賞鈔萬五千貫敕
中外希賞自請者勿予己亥太陰犯昴賜女巫巴雅爾

台鈔萬五千貫庚子以江南行御史臺中丞廉恂為中書平章政事辛丑賜公主咱雅巴拉等鈔七萬五千貫晉王伊遜特穆爾遣使以地七千頃歸朝廷請有司徵其租稅給糧鈔從之以遼陽金銀鐵冶歸中政院癸卯賜伶人鈔二萬五千貫酒人十五萬貫己巳以知樞密院事額爾吉納為江西行省平章政事是月後衛屯田及潁息汝陽上蔡等縣水霸州及堂邑縣蝻八月丁未朔嶺北省臣實都坐以官錢犒軍免官詔復其職戊申祭社

稷罷曲靖路人匠提舉司賑晉王部軍民鈔二百五十

萬貫崇星于司天監辛亥賑龍居河諸軍乙卯賜上都

駐冬衛士鈔四百萬貫諸王瑪納濟部饑興聖宮牧駝

戶貧乏竝賑之丙辰祔仁宗聖文欽孝皇帝莊懿慈聖

皇后于太廟特們德爾攝太尉奉玉冊行事太白犯靈

臺戊午特們德爾以趙世延嘗劾其姦誣以不敬下獄

請殺之并究省臺諸臣不允帝幸涼亭從容謂近侍曰

特們德爾必欲寘趙世延于死地朕素聞其忠良故每

奏不納左右咸稱萬歲乙丑熒惑犯天江丁卯太白犯

太微垣右執法宮人官奴坐用日者請太皇太后營星杖

之籍其資圖沙瑪部宣慰使琳沁坐違制不發兵詔杖

流尼魯罕之地庚午發米十萬石賑糶京師貧民壬申

太陰犯軒轅御女甲戌廣東新州饑賑之河間路水九

月甲申建壽安山寺給鈔千萬貫括興和馬以贍北部

貧民禁五臺山樵採罷上都嶺北甘肅河南諸郡酒禁

乙酉太陰犯壘壁陣丙戌熒惑犯斗壬辰敕議玉華宮

歲享睿宗登歌大樂土番利族阿俄等五種寇成谷遣
鞏昌總帥以兵討之循州溪蠻秦元吉為寇遣守將捕
之癸巳太陰犯昴瀋陽水旱害稼弛其山場河泊之禁
戊戌太陰犯鬼己亥太白犯亢庚子常澧州洞蠻貞公
合諸洞為寇命土官追捕之癸卯親王圖卜布哈吹巴
勒遣使賀登極甲辰雲南木邦路土官給邦子忙兀等
入貢賜幣有差遣茂扎木等使占城占臘龍牙門索馴
象以廩藏不充停諸王所部歲給冬十月丁未時享太

廟庚戌太陰犯熒惑于斗將作院使伊蘇坐董製珠衣
怠工杖之籍其家壬子作佛事於文德殿四十日申嚴兩
淮鹽禁丁巳酉陽聳儂洞蠻田謀遠為寇命守臣招捕
之戊午車駕至上都詔太常院臣曰朕將以四時躬
祀太室宜與羣臣集議其禮此追遠報本之道毋以朕
勞于對越而有所損其悉遵典禮安南國遣其臣鄧恭
儉貢方物庚申敕譯佛書辛酉賜勞特默齊宿衛者遣
還所部癸亥太陰犯井乙丑幸大護國仁王寺帝師請

以卓特巴嘉勒燦為土番宣慰司都元帥從之酉陽土
官丹世昌遣其子丹朝率大小石隄洞蠻入貢丙寅定
恭謝太廟儀式丁卯為皇后作盃頂殿于上都己巳罷
玉華宮祀睿宗登歌樂敕翰林院譯詔闕白中書庚午
命拜珠督造壽安山寺癸酉流諸王阿拉克特穆爾於
雲南十一月丙子朔帝御齋宮丁丑謝太廟至仁宗太
室即流涕左右感動戊寅以海運不給命江浙行省以
財賦府租益之還其直歸宣徽中政二院檢勘沙淨二

州流民勒還本部以登極大賚諸王百官中書會其數

計金五千兩銀七十八萬兩鈔百二十一萬一千貫幣

五萬七千三百六十四疋帛四萬九千三百二十二疋

木綿九萬二千六百七十二疋布二萬三千三百九十

八疋衣八百五十九襲鞍勒弓矢有差給嶺北驛牛馬

造今年鈔本至元鈔五千萬貫中統鈔二百五十萬貫

汰衛士冒受歲賜者庚辰併永平路灤邑縣于石城遣

鼎珠等括順陽王溫都遜布哈邸財物入章佩監中政

院禁京城諸寺邸舍匿商稅辛巳以親祀太廟禮成御
大明殿受朝賀甲申敕翰林國史院纂修仁宗實錄丁
亥作佛事于光天殿戊子幸隆福宮己丑宣德蒙古驛
饑命通政院賑之丁酉詔各郡建帝師帕克斯巴殿制
視孔子廟有加戊戌交趾蠻儂志德寇脫零那乞等六
洞命守將討之遣使閱實各行省戍兵己亥計京官俸
鈔給米三分癸卯熒惑犯壘壁陣甲辰特們德爾言和市
織幣薄惡由董事者不謹請免右丞高昉等官仍令郡

縣更造徵其元直不允太常禮儀院擬進時享太廟儀式十二月乙巳朔詔曰朕祗適貽謀獲承丕緒念付託之惟重顧繼述之敢忘爰以延祐七年十一月二日被服袞冕恭謝于太廟既大禮之告成宜普天之均慶屬茲踰歲用易紀元于以導天地之至和于以法春秋之謹始可以明年為至治元年減天下租賦二分包銀五分免大都上都興和三路差稅三年優復煮鹽煉鐵等戶二年開燕南山東河洎之禁聽民采取命官家屬流落

邊遠者有司資給遣之其子女典鬻於人者聽還其家
監察御史廉訪司歲舉可任守令者二人七品以上官
有偉畫長策可以濟世安民者實封上之士有隱居行
義明治體不求聞達者有司具狀以聞丁未播州蠻蠻
的羊籠等來降庚戌鑄銅佛像置玉德殿壬子賜壽寧
公主鈔七萬五千貫癸丑以天壽節預遣使修醮于龍
虎山乙卯率百官奉玉冊玉寶加上太皇太后尊號曰
儀天興聖慈仁昭懿壽元全德泰寧福慶徽文宗祐太

皇太后翰林學士呼圖克都哩譯進宋儒真德秀大學
衍義帝曰修身治國無踰此書賜鈔五萬貫河南饑帝
問其故羣臣莫能對帝曰良由朕治道未洽卿等又不
盡心乃職委任失人致陰陽失和災害荐至自今各務
勤恪以應天心毋使吾民重困太陰掩昴丙辰以太皇
太后加號禮成御大明殿受朝賀丁巳詔諭中外戊午
太陰犯井庚申太陰犯鬼辛酉作延春閣後殿壬戌召
西僧年扎克策喇實赴京敕所過郡縣肅迎乙丑崇星

于回回司天監四十晝夜丙寅以典瑞院使庫春貝知
樞密院事修祕密佛事于延春閣丁卯特們德爾拜珠
言比者詔內外言得失今上封事者或直進御前乞令
臣等開視乃入奏聞帝曰言事者直至朕前可也如細
民輒訴訟者則禁之給武宗皇后鈔七十五萬貫以大
學衍義印本頒賜羣臣戊辰以太皇太后加號禮成告
太廟己巳敕罷明年二月八日迎佛中書右丞茂巴爾
罷為江西行省右丞以中書參知政事濟爾噶朗為右

丞江南浙西道廉訪使薛處敬為中書參知政事遣使

閱奉元路軍需庫辛未拜珠進鹵簿圖帝以唐制用萬

二千三百人耗財乃定大駕為三千二百人法駕二千

五百人上思州徭結交趾寇忠州癸酉帝聞賀巴延母

老憫之以所籍京兆田磴還其家江浙行省平章政事

巴延徹爾江西行省平章政事布色圖竝坐貪墨免官

是歲決獄輕重七千六百三十事河決汴梁原武浸灌

諸縣滹沱決文安大成等縣渾河溢壞民田廬秦州成

紀縣暴雨山崩朽壤墳起覆沒畜產汴梁延津縣大風
晝晦桑多損大同雨雹大者如鷄卵諸衛屯田隕霜害
稼益津縣雨黑霜至治元年春正月丁丑修佛事于文
德殿壬午增置瀋州都漕運司同知運判各一員甲申
召高麗王王章赴上都丙戌帝服袞冕享太廟以左丞
相拜珠亞獻知樞密院事庫春身終獻詔羣臣曰一歲
惟四祀使人代之不能致如在之誠實所未安歲必親
祀以終朕身廷臣或言祀事畢宜赦天下帝諭之曰恩

可常施赦不可屢下使殺人獲免則死者何辜遂命中書
陳便宜行之丁亥帝欲以元夕張燈宮中參議中書省事
張養浩上書諫止帝命罷之曰有臣若此朕復何憂自今
朕凡有過豈獨臺臣當諫人皆得言賜養浩帛二疋諸
王呼圖克岱爾來朝癸巳諸王烏魯斯部饑發淨州平
地倉糧賑之蘄州蘄水縣饑賑糧三月奉元路饑禁酒乙未
太陰掩房己亥降延福監為延福提舉司廣福監為廣福
提舉司秩從五品以壽安山造佛寺置庫掌財帛秩從

七品甲辰辰星犯外屏水金火土四星聚奎二月汴梁
歸德饑發粟十萬石賑糶河南安豐饑以鈔二萬五千
貫粟五萬石賑之戊申祭社稷改中都威衛為忠翊侍
衛親軍都指揮使司己酉作仁宗神御殿于普慶寺辛
亥調軍三千五百人修上都華嚴寺壬子夜金火土三
星聚于奎大永福寺成賜金五百兩銀二千五百兩鈔
五十萬貫幣帛萬匹丁巳畋于柳林敕更造行宮監察
御史觀音保索約勒哈迪密實成珪李謙亨諫造壽安山

佛寺殺觀音保索約勒哈迪密實杖珪謙亨竄於尼魯
罕地己未樞密院臣請授副使吳元珪榮祿大夫以階
高不允授正奉大夫賑摩琳道三十一驛貧戶辛酉太
白犯熒惑癸亥太陰犯心甲子置承徽寺秩正三品割
常州宜興民四萬戶隸之丁卯以僧法洪為釋源宗主
授榮祿大夫司徒禁越臺省訴事罷先朝傳旨濫選者
戊辰賜公主咱雅巴拉從者鈔七十五萬貫三月甲戌
營王額森特穆爾部畜牧死損賜鈔五十萬貫丙子建

帝師帕克斯巴寺於京丁丑御大明殿受緬國朝貢太
陰掩昴賜公主滿達勒鈔五萬貫駙馬摩琳鈔二萬五
千貫名諸王太平于汴發民丁疏小直沽白河庚辰廷
試進士台哈布哈宗本等六十四人賜及第出身有差
辛巳車駕幸於上都賜西番薩斯嘉地僧金二百五十
兩銀二千二百兩袈裟二萬幣帛幡茶各有差壬午遣
呪師多爾濟往伊濟巴勒布二國取佛經癸未製御服
珠袈裟甲申敕纂修仁宗實錄后妃功臣傳乙酉寶集

寺金書西番波若經成置大內香殿益壽安山造寺役
軍已丑大同路麒麟生甲午置雲南王府己亥宦者博
囉特穆爾坐罪流尼魯罕地庚子賑寧國路饑辛丑以
特克實為御史大夫佩金符領忠翊侍衛親軍都指揮
使癸卯益都般陽饑賑之夏四月丙午給諾木達實王
府銀印秩正三品庫春和塔拉默色王府銅印秩從三
品庚戌享太廟江州贛州臨江霖雨袁州建昌旱民告
饑發米四萬八千石賑之丁巳廣德路旱發米九千石

減直賑糶戊午太陰犯心己未造象駕金脊殿吉陽黎
蠻寇寧遠縣庚申太陰犯斗戊辰敕賜特們德爾父祖
碑命宦者博囉台為太常署令太常官言刑人難與大
祭遂罷之五月丙子毀上都回回寺以其地營帝師殿
賑益都膠州饑丁丑霸州蝗戊寅太白犯鬼積尸氣太
陰犯軒轅庚辰太陰犯明堂濮州大饑命賑之壬午遷
親王圖卜特穆爾于海南禁日者毋交通諸王駙馬掌
陰陽五科者毋泄占候以興國路去歲旱免其田租丁

亥修佛事於大安閣庚寅賑諸王哈布爾特穆爾部沂州

民張昱坐妖言濟南道士李天祥坐教人兵藝杖之女

直密齊軒等十九驛饑賑之辛卯海漕糧至直沽遣使

祀海神天妃作行殿于縉山流杯池高郵府旱癸巳寶

定路飛蟲食桑乙未命世家子弟成童者入國學辛丑

太常禮儀院進太廟制圖壬寅開元路霖雨六月癸卯

朔日有食之作金浮屠于上都藏佛舍利乙卯以特們

德爾領宣政院事丁巳參知政事敬儼罷為陝西行御

史臺中丞戊午涇州雨雹己未太陰犯虛梁滁州霖雨

傷稼蠲其租辛酉太白經天趙宏祚等言事勒歸鄉里

仍禁妄言時政壬戌龍虎山張嗣茂來朝授太玄輔化

體仁應道大真人乙丑遣使往銓江浙江西湖廣四川

雲南五省邊郡官選丁卯崇星于司天臺大同路雨雹

戊辰衛輝汴梁等處蝗己巳以上都留守濟爾噶朗為

中書平章政事臨江路旱免其租通濟屯霖雨傷稼霸

州大水渾河溢被災者二萬三千三百戶秋七月壬申

賜晉王伊蘇特穆爾鈔百萬貫遼陽開元等路及順州
邢臺等縣大水癸酉衛輝路胙城縣蝗乙亥賑南思新
州饑丙子淮安路屬縣水丁丑享太廟戊寅通州潞縣
榆棣水決庚辰鹵簿成滹沱河及范陽縣巨馬河溢辛
巳盤屋縣僧圓明作亂遣樞密院判官章台督兵捕之
壬午通許臨淮盱眙等縣蝗癸未封太尉布呼齊為和國
公乙酉大雨渾河防決庚寅清池縣灾癸巳太陰犯昴
黃平府蠻盧砮為寇削萬戶何之祺等官一級遣吏部

尚書嘉琿禮部郎中文矩使安南頒登極詔諸王庫本

堯賻鈔萬五千貫丙申禁服色踰制己亥奉仁宗及帝

御容於大聖壽萬安寺蒲陰縣大水庚子修上都城詔

河南江浙流民復業淮西蒙城等縣饑邵陽道士劉志

先以妖術謀亂復命章台捕之薊州平谷漁陽等縣大

水大都保定真定大名濟寧東平東昌永平等路高唐

曹濮等州水順德大同等路雨雹竒爾濟蘇部水八月

壬寅修都城安陸府水壞民廬舍癸卯賑膠州饑甲辰

高郵興化縣水免其租丙午泰興江都等縣蝗丁未太
陰犯心戊申祭社稷上都盂頂殿成己酉太陰犯斗庚
戌以軍士貧乏遣知樞密院事特穆爾布哈整治仍詔
諭中外有敢擾害者罪之賑北部孤寡糧鈔賜公主蘇
喀巴拉鈔五十萬貫烏嚕斯哈勒哈努森等部貧戶給
牝馬二匹壬子熒惑犯軒轅乙卯中書平章政事特穆
爾圖罷為上都留守壬戌淮安路鹽城山陽縣水免其
租車駕駐蹕興和左右以寒甚請還京師帝曰兵以牛

馬為重民以稼穡為本朕遲留蓋欲馬得芻牧民得刈

穫一舉兩得何計乎寒雷州路海康遂溪二縣海水溢

壞民田四千餘頃免其租秦州成紀縣山崩九月乙亥

熒惑犯靈臺京師饑發粟十萬石減價糶之丙子駐蹕

昴阿嶺壬午熒惑犯太微西垣上將賜諸王色埒黜鈔

五萬貫壬辰中書平章政事塔斯哈雅坐受贓杖免丁

酉熒惑犯太微垣右執法車駕還大都庚子安陸府漢

水溢壞民田賑之冬十月辛丑朔修佛事於太內妖僧

圓明等伏誅甲辰太白經天戊申熒惑犯太微垣左執
法庚戌親享太廟壬子拜珠獻嘉禾兩莖同穗癸丑敕
翰林集賢官年七十者毋致仕以內郡水罷不急工役
敕蒙古子女鬻為回回漢人奴者官收養之禁中書掾
曹母泄機事命樞密官整視各郡兵馬戊午置趙王滿
濟勒噶部錢糧總管府秩正三品己未肇慶路水賑之
丙寅河南行省參知政事鼐智密鼎坐殘忍免官丁
卯增置侍儀司通事舍人六員侍儀舍人四員己巳遣

雅克特穆爾巡邊十一月辛未榮感犯進賢乙亥幸大

護國仁王寺丙子太陰犯虛梁戊寅御大明殿羣臣上

尊號曰繼天體道敬文仁武大昭孝皇帝是夜辰星犯

房己卯以受尊號詔天下拜珠請釋囚不允庚辰益壽

安山寺役卒三千人辛巳命御史大夫特克實領左右

阿蘇衛丙戌太陰犯井丁亥以教官待選者借注廣海

巡檢己丑太陰犯酒旗軒轅庚寅拜珠等言受尊號宜

謝太廟行一獻禮世祖亦嘗議行武宗則躬行謝禮詔

曰朕當親謝命太史卜日樞密選兵肄鹵簿辛卯太陰
犯明堂癸巳以營田提舉司徵酒稅擾民命有司兼權
之甲午以遼陽行省管內山場隸中政院丙申敕立故
丞相安圖碑于保定新城戊戌鞏昌成州饑發義倉賑之
己亥太白犯西咸十二月庚子給蒙古子女冬衣辛丑
立伊竒哩氏為皇后遣攝太尉中書右丞相特們德爾
持節授玉冊玉寶癸卯以立后詔天下慶遠路饑真定
路疫竝賑之甲辰熒惑犯亢戊申躬謝太廟庚戌太陰

犯昴作太廟正殿甲寅疏玉泉河車駕幸西僧灌頂寺

己未封索諾木藏布為白蘭王錫金印真定保定大名

順德等路水民饑禁釀酒以金虎符頒各行省平章政事

辛酉熒惑入氐甲子置田糧提舉司掌薊景二州田賦

以給衛士貧乏者秩從五品命帝師袞噶諾爾布喇實

置勒燂巴勒藏布詣西番受具足戒賜金千三百五十

兩銀四千五十兩幣帛萬匹鈔五十萬貫以諸王奇卜

使者數入朝發兵守北口及盧溝橋河間路饑賑之復

以馬嘉努為司徒乙丑置中瑞司冶銅五十萬斤作壽
安山寺佛像寧海州蝗歸德遼陽通州等處水

元史卷二十七

元史卷二十七考證

延祐七年二月壬子 按壬子原刻作壬午以支干推
之自係壬子之訛今改

十二月乙巳朔詔曰朕祇遵貽謀獲承丕緒念付託之
惟重顧繼述之敢忘爰以延祐七年十一月二日被
服袞冕恭謝於太廟 按二日原刻作丙子考上文
恭謝太廟在丁丑則丙子之誤無疑今依元典章所

載詔文改正

秦州成紀縣暴雨

按秦州原刻訛秦州今據地理志

改

至治元年冬十一月甲辰

按甲辰原刻作甲午考辛

丑至戊申中間無甲午日元史類編改作丙午亦無
所據今據天文志改

十一月乙亥 按乙亥原刻作己亥以支干推之自係
乙亥之訛今改



總校官編修臣吳紹濂

欽定四庫全書薈要

史部
元史卷二十八
至三十八

詳校官主事銜臣徐以坤



欽定四庫全書薈要卷六千四百七 史部

元史卷二十八

明翰林學士亞中大夫知制誥兼修國史宋濂等修

本紀第二十八

英宗二

二年春正月己巳朔安南占城各遣使來貢方物壬申保定雄州饑賑之庚午廣太廟甲戌禁漢人執兵器出獵及習武藝丁丑太陰犯昴親祀太廟始陳鹵簿賜導

駕耆老幣帛戊寅敕有司存恤孔氏子孫貧乏者已卯

山東保定河南汴梁歸德襄陽汝寧等處饑發米三十

九萬五千石賑之庚辰太白犯建星公主喇特納巴拉

下嫁詔賜鈔五十萬貫辛巳太白犯建星敕臺憲用人

勿拘資格儀封縣河溢傷稼賑之癸未流嶽政院使羅

源于耽羅建行殿于柳林封塔齊爾為蘭國公辛卯太

陰犯心癸巳以西僧羅卜藏為司徒遼州饑糶米十萬

石賑之甲午熒惑犯房丁酉太白犯牛二月己亥朔熒

惑犯鍵閉星庚子置左右欽察衛親軍都指揮使司命
拜珠總之罷上都歇山殿及帝師寺役辛丑賜特克實
父祖碑癸卯以江南行臺御史大夫竒徹為中書平章
政事江浙行省叅政王居仁為中書叅知政事薛處敬
罷為河南行省左丞丙午熒惑犯罰星戊申祭社稷順
德路九縣水旱賑之太陰犯井庚戌熒惑犯東咸辛亥
太陰犯酒旗軒轅壬子太白犯壘壁陣賜諸王諳達布
哈鈔七萬五千貫以綽克台圖古勒死事賜鈔三萬五

千貫諸王竒卜遣進文豹河間路饑禁釀酒癸丑太陰
犯明堂甲寅以太廟役軍造流盃池行殿廣海郡邑官
曠員敕願往任者陞秩二等乙卯以遼陽行省平章政
事瑪魯為中書平章政事西僧伊實拉默特藏布疾詔
為釋大辟囚一人答罪二十人戊午賑真定等路饑己
未太陰犯天江括馬賜宗仁衛壬戌太白犯壘壁陣諸
王竒卜遣進海東青鶻癸亥遼陽等路饑免其租仍賑
糧一月甲子恩州水民饑疫賑之三月己巳中書省臣

言國學廢弛請令中書平章政事廉恂參議中書事張
養浩都事富珠哩翀董之外郡學校仍命御史臺翰林
院國子監同議興舉從之敕四宿衛興聖宮及諸王部
勿用南人烏魯斯告訐父母斬之辛未禁捕天鵝違者
籍其家壬申復張珪司徒臨安路河西諸縣饑賑之祭
酉河南兩淮諸郡饑禁釀酒丙子延安路饑賑糧一月
罷京師諸營繕役卒四萬餘人河間河南陝西十二郡
春旱秋霖民饑免其租之半戊寅修都城庚辰敕江浙

僧寺田除宗故有永業及世祖所賜者餘悉稅之癸未
賑遼陽女直漢軍等戶饑乙酉賑濮州水災丙戌以親
祀禮成賜與祭者幣普減內外官吏一資萬戶哈喇諾
海以私粟賑軍賜銀帛仍酬其直給行通政院印賜潛
邱四宿衛士鈔有差復置市泊提舉司於泉州慶元廣
東三路禁子女金銀絲帛下番丁亥鳳翔道士王道明
妖言伏誅己丑有暈貫日如連環賜諸王鄂羅木烏遜
銀印命有司建穆呼哩祠於東平仍樹碑以國用匱竭

停諸王及皇后達爾瑪實哩等歲賜庚寅曹州滑州饑
賑之命將作院更製冕旒辛卯遣御史錄囚置甘州巴
勒噶遜驛監察御史何守謙坐贓杖免壬辰賑上都十
一驛給宗仁衛蒙古子女衣糧賜諸王托里特穆爾鈔
五萬貫甲午遼陽哈勒巴民饑賑之丁酉幸柳林駙馬
許納之子蘇克訢曰臣父謀叛臣母私從人帝曰人子
事親有隱無犯今有過不諫乃復告訢命誅之賑奉元
路饑夏四月戊戌朔車駕幸上都己亥嶺北蒙古軍饑

給糧遣還所部庚子賑彰德路饑壬寅真州火徽州饑
並賑之辛亥涇州雨雹免被災者租壬子公主實哩達
喇菟賜鈔五萬貫甲寅南陽府西穰等屯風雹洪澤芍
陂屯田去年旱蝗並免其租丙辰思州饑禁釀酒乙丑
中書省臣請節賞賚以紓民力帝曰朕思所出倍於所
入出納之際卿輩宜慎之朕當撙節其用丙寅賜邊卒
鈔帛賑東昌霸州饑民松江府上海縣水仍旱五月已
巳以公主蘇喀巴拉為趙國大長公主免德安府被災

民租修滹沱河堤彰德府饑禁釀酒庚午秦符臨邑二
縣民謀逆其首王驢兒伏誅餘杖流之睢許二州去年
水旱免其租辛未駙馬托克托卒賜鈔一萬貫丙子熒
惑退犯東咸庚辰賑固安饑置營於永平收養蒙古子
女遣使諭四方匿者罪之癸未以御史大夫托克托為江
南行臺御史大夫置宗仁蒙古侍衛親軍都指揮使司
甲申車駕幸五臺山賑夏津永清二縣饑以濟爾噶朗
為御史大夫乙酉以拜珠領宗仁蒙古侍衛親軍都指

揮使司事佩三珠虎符京師饑發粟二十萬石賑糶雲
南行省平章達實特穆爾多爾濟坐贓杖免戊子禁集
衆祈神庚寅河南陝西河間保定彰德等路饑發粟賑
之仍免常賦之半調各衛漢軍二千充宗仁衛屯田卒
祭星於五臺山甲午賑鞏昌階州饑丙申以吳全節為
玄教大宗師進上卿閏月戊戌封諸葛忠武侯為威烈
忠武顯靈仁濟王辛丑萬戶李英以良民為奴擅文其
面坐罪丁卯禁白蓮佛事睢陽縣亳社屯大水饑賑之

諸王阿穆爾清托克坐擅徙圖埒訥王衛士並杖流海
南甲辰御史臺臣請黜監察御史不稱職者以示懲勸
從之丙午嶺北戍卒貧乏賜鈔三千二百五十萬貫帛
五十萬足戍申賑奉元路鄆縣及成州饑以特們德爾
子同知樞密院事巴勒丹知樞密院事己酉額布根巴
圖爾戍邊有功賜金鈔壬子作紫檀殿乙卯以淮安路
去歲大水遼陽路隕霜殺禾南康路旱並免其租壬戌
安豐屬縣霖雨傷稼免其租興元褒城縣饑賑之甲子真

定山東諸路饑弛其河泊之禁丙寅辰州沅陵縣洞蠻

為寇遣兵捕之敕已除不赴任者奪其官封公主蘇喀

巴拉乳母為順國夫人六月丁卯朔車駕至五臺山禁

扈從宿衛毋踐民禾置中慶大理二路推官各一員戊

辰揚州屬縣旱免其租己巳廣元路綿谷昭化二縣饑

官市米賑之壬申熒惑犯心癸酉申禁日者妄談天象

甲戌新平上蔡二縣水免其租丙子修渾河堤壬午辰

州江水溢壞民廬舍丁亥奉元屬縣水淮安屬縣旱並免

其租庚寅思州風雹建德路水皆賑之秋七月戊戌淮
安路水民饑免其租己亥熒惑犯天江丁未賜拜珠平
江田萬畝壬子遣親王色徹圖總兵北邊賜金二百五
十兩銀二千五百兩鈔五十萬貫戊午太陰犯井宿鉞
星車駕次應州曲赦金城縣囚徒庚申陞靖州為路辛
酉次渾源州中書左丞張思明坐罪杖免籍其家甲子
錄京師諸役軍匠病者千人各賜鈔遣還南康路大水
廬州六安縣大雨水暴至平地深數尺民饑命有司賑

糧一月八月戊辰祭社稷己巳道州寧遠縣民符翼軫

作亂有司討擒之壬申蔚州民獻嘉禾甲戌賜奉聖州

築宗仁衛營給廬州流民復業者行糧戊寅詔畫蠶麥

圖於盞頂殿壁以時觀之可知民事也己卯廬州路六

安舒城縣水賑之戊辰增壽安山寺役卒七千人庚寅

特們德爾卒命給直市其葬地甲午瑞州高安縣饑賑

之九月戊戌大寧路碩達勒達等驛水傷禾賑之給蒙

古子女貧乏者鈔七百五十萬貫戊申給壽安山造寺

役軍匠死者鈔人百五十貫庚戌申禁江南典雇妻妾
辛亥幸壽安山寺賜監役官鈔人五千貫甲寅賑淮東
秦興等縣饑丙辰太皇太后崩戊午賜蒙古子女鈔百
五十萬貫己未太陰犯明堂庚申敕停今年冬祀南郊
癸亥地震甲子臨安河西縣春夏不雨種不入土居民
流散命有司賑給令復業作層樓於涿州蓋頂殿西丙
寅西僧巴勒濟特疾賜鈔五萬貫冬十月丁卯太史
院請禁明年興作土功從之戊辰享太廟以國哀迎香

去樂修廟工役未畢妨陳宮懸止用登歌丙子押濟思
國遣使貢方物江南行臺大夫托克托坐請告未得旨
輒去職杖謫雲南庚辰至辛巳太陰犯井甲申建太祖
神御殿于興教寺己丑熒惑犯壘壁陣以拜珠為中書
右丞相南恩州賊潭庚生等降十一月甲午朔日有
食之己亥以立右丞相詔天下流民復業者免差稅
三年站戶貧乏鬻賣妻子者官贖還之凡差役造作
先科商賈末技富實之家以優農力免陝西明年差

稅十之三各處官佃田明年租十之二江淮勅科包銀
全免之御史李瑞言近者京師地震日月薄蝕皆臣下
失職所致帝自責曰是朕思慮不及致然因敕羣臣亦
當修飭以謹天戒罷世祖以後冗置官括江南僧有妻
者為民安南國遣使貢方物回賜金四百五十兩金幣
九帛如之癸卯地震甲辰太白犯壘壁陣罷徽政院乙
巳熒惑犯壘壁陣丙午造龍船三艘戊申太陰掩井岷
州旱疫賑之賜戍北邊萬戶千戶等官金帶御史李端

言朝廷雖設起居注所錄皆臣下聞奏事目上之言動宜悉書之以付史館世祖以來所定制宜著為令使吏不得為奸治獄者有所遵守並從之乙卯遣西僧果爾卓幹迎帝師宣德府宣德縣地屢震賑被灾者糧鈔已未太陰犯東咸定托克托和斯入流官選給印與俸置八番軍民安撫司改長官所二十有八為州縣庚申太陰犯天江辛酉熒惑犯歲星真人蔡遁秦殺人伏誅刑部尚書布達實哩坐受其金范德郁坐說隨並杖免

平江路水損官民田四萬九千六百三十頃免其租十
二月甲子朔南康建昌州大水山崩死者四十七人民
饑賑之乙丑太白歲星熒惑三星聚于室太白犯壘壁
陣丁卯中書平章政事瑪魯罷為大司農廉恂罷為集
賢大學士以集賢大學士張珪為中書平章政事戊辰
以掌道教張嗣成吳全節藍道元各三授制命銀印敕
奪其二壬申免回回人戶屯戍河西者銀稅甲戌兩江
來安路總管岑世興作亂遣兵討之特們德爾子宣政

院使巴爾斯濟蘇坐受劉夔冒獻田地伏誅籍其家乙亥太陰掩井丙子增鎮南王圖卜布哈戍兵戊寅太白犯歲星庚辰葛蠻安撫司副使龍仁貴作亂湖廣行省督兵捕之以知樞密院事竒徹台為宣政院使參知政事蘇蘇為中書左丞宗仁侍衛親軍都指揮使瑪喇勒為參知政事癸未紹興路柔遠州洞蠻把者為寇遣兵捕之以御大夫濟爾噶朗知樞密院事封色徹圖為武寧王授金印以地震日食命中書省樞密院御史臺翰

林集賢院集議國家利害之事以聞敕兩都營繕仍舊
餘如議弛河南陝西等處酒禁禁近侍奏取沒入錢物
乙酉杭州火賑之丙戌定謚太皇太后曰昭獻元聖遣
太常禮儀院使托迪以謚議告于太廟陞寧昌府為下
路增置一縣併雲南西沙縣入寧州賜淮安忠武王巴
延祠祭田二十頃己丑熒惑犯外屏太陰犯建星辛卯
給蒙古流民糧鈔遣還本部張珪足疾免朝賀西僧灌
頂疾請釋囚帝曰釋囚祈福豈為師惜朕思惡人屢赦

反害善良何福之有宣徽院臣言世祖時鴻吉哩歲輸
尚食羊二千成宗時增為三千今請增五千帝不許曰
天下之民皆朕所有如有不足朕當濟之若加重賦百
姓必致困窮國亦何益命遵世祖舊制徽州廬州濟南
真定河間大名歸德汝寧鞏昌諸處及河南芍陂屯田
水大同衛輝江寧屬縣及豐贍署大惠屯風河南及雲
南烏蒙等處屯田旱汴梁順德河間保定慶元濟寧濮
州益都諸屬縣及諸衛屯田蝗

三年春正月癸巳朔暹國及八番洞蠻酋長各遣使來
貢曹州禹城縣去秋霖雨害稼縣人邢著程進出粟以
賑饑民命有司旌其門乙未享太廟己亥思明州盜起
湖廣行省督兵捕之庚子刑部尚書烏瑪喇坐贓杖免
壬寅命太僕寺增給牝馬百匹供世祖仁宗御容殿祭
祀馬湏和琳教拉圖等驛戶貧乏給鈔賑之以行中書
省平章政事復兼總軍政軍官有罪重者以聞輕者就
決罷上都雲州興和宣德蔚州奉聖州及鷄鳴山房山

黃蘆三義諸金銀冶聽民採鍊以十分之三輸官授前
樞密院副使吳元珪王約集賢大學士翰林侍講學士
韓從益昭文館大學士並商議中書省事拜珠言前集
賢侍講學士趙居信直學士吳澄皆有德老儒請徵用
之帝喜曰卿言適副朕意更當搜訪山林隱逸之士遂
以居信為翰林學士承旨澄為學士增置上都留守司
判官二員以漢人為之專掌刑名置仁宗中宮位提舉
司二秩正五品隸承徽寺太陰犯鉞星又犯井癸卯太

陰犯井甲辰鎮西武靖王部饑賑之遣諸王呼喇珠鎮雲南賜鈔萬五千貫辛亥申命特克實振舉臺綱壬子建諸王驛於京師遣回回砲手萬戶赴汝寧新蔡遵世祖舊制教習砲法靜江邕柳諸郡獠為寇命湖廣行省督兵捕之甲寅以宗仁衛蒙古子女額足萬戶命罷收之乙卯征東摩濟地沃濟戶以貂鼠水獺海狗皮來獻詔存卹三歲丙辰泉州民留應總作亂命江浙行省遣兵捕之丁巳定封贈官等秩辛酉禁故殺子孫誣平民

者增置兵部尚書一員四川行省平章政事趙世延為
其弟訟不法事繫獄待對其弟逃去詔出之仍著為令
逃者百日不出則釋待對者命樞密副使完顏納丹侍
御史曹伯啓伊克扎爾古齊布延集賢學士奇徹翰林
直學士曹元用聽讀仁宗時纂集累朝格例敕常調官
外不次銓用者但陞以職勿陞階二月癸亥朔作上都
華嚴寺帕克斯巴帝師寺及拜珠第役軍六千二百人
定軍官襲職嫡長子孫幼者令諸兄弟姪攝之所受制

敕書權襲以息爭訟是夜熒惑太白填星三星聚于胃
丙寅翰林國史院進仁宗實錄遣嘉琿等往西番撫初
附之民徵畜牧治郵傳戊辰祭社稷天壽節賓丹瓜哇
等國遣使來貢己巳修廣惠河牘十有九所治野狐桑
乾道癸酉畋于柳林顧謂拜珠曰近者地道失寧風雨
不時豈朕纂承大寶行事有闕歟對曰地震自古有之
陛下自責固宜良由臣等失職不能變理帝曰朕在位
三載于兆姓萬物豈無乖戾之事卿等宜與百官議有

便民利物者朕即行之置鎮遠王額布根王傳官屬罷
播州黃平府長官所一徙其民隸黃平是夜太白犯昴
辛巳造五輅司徒劉夔同僉宣政院事囊嘉特坐妄獻
地土冒取官錢伏誅格例成定凡二千五百三十九條
內斷例七百一十七條格千一百五十一詔赦九十四
令類五百七十七名曰大元通制頒行天下是夜太陰
犯東咸癸未賑北邊軍鈔二十五萬錠糧二萬石命宣
徽院選蒙古子男四百入宿衛罷徽政院總管府三都

總管府隸有司齊哩克昆及人匠總管府隸陝西行中
書省降開成路為州丙戌雨土京師饑發粟二萬石賑
糴造五輅旗丁亥敕金書藏經二部命拜珠等總之戊
子封鷹師布哈為趙國公辛卯以太子賓客巴圖廉貧
賜鈔十萬貫諸王諤斯伯遣使來朝罷青海宣慰司及
萬戶府改立屯田總管府諸王徹伯爾奇卜遣貢蒲萄
酒海漕糧至直沽遣使祀海神天妃三月壬辰朔車駕
幸上都賜諸王納丹珊延鈔二百五十萬貫復給諸王

托歡歲賜丁酉平江路嘉定州饑發粟六萬石賑之戊戌安豐芍陂屯田女直戶饑賑糧一月庚子崇明諸州饑發米萬八千三百石賑之甲辰台州路黃巖州饑賑糧兩月丁未西番贊布凌諸族叛敕鎮西武靖王吹巴勒等發兵討之戊申祔太皇太后于順宗廟室遣攝太尉中書右丞相拜珠奉玉冊玉寶上尊諡曰昭獻元聖皇后辛亥以圓明王道明之亂禁僧道度牒符籙丙辰敕醫卜匠官居喪不得去職七十不聽致仕子孫無蔭

敘能紹其業量材錄用監察御史拜珠嘉琿坐舉巴爾
斯濟蘇失當並黜免諸王和爾和部軍驛戶饑賑之夏
四月壬戌朔敕天下諸司命僧誦經十萬部丙寅察汗
諾爾蒙古軍驛戶饑賑之丁卯旌內黃縣節婦王氏已
巳浚金水河甲戌命張珪及右司員外郎王士熙勉勵
國子監學敕都功德使科爾羅至京師釋囚大辟三十
一人杖五十七以上者六十九人放籠禽十萬令有司
償其直己卯詔行助役法遣使考視稅籍高下出田若

干畝使應役之人更掌之收其歲入以助役費官不得
與北邊軍饑賑之蒙古大千戶部比歲風雪斃畜牧賑
鈔二百萬貫救京師萬安慶壽聖安普慶四寺揚子江
金山寺五臺萬聖祐國寺作水陸佛事七晝夜丁亥故
羅羅斯宣慰使述古妻漂末權領司事遣其子娑住邦
來獻方物戊子南豐州民及鞏昌蒙古軍饑賑之五月
辛卯設大理路白鹽城權稅官秩正七品中慶路權稅
官秩從七品置安慶瀟山縣雲南寧遠州戊戌太白經

天庚子大風雨雹拔柳林行宮內外大木二千七百辛
丑以特克實署御史大夫事壬寅雲南行省平章政事呼
遜坐贓杖免詔中外開言路置慶元路嶧山縣增尉一
員徙安寨縣於龍安驛癸卯太陰犯房乙己嶺北米貴
禁釀酒戊申監察御史蓋繼元宗翼言特們德爾奸險
貪污請毀所立碑從之仍追奪官爵及封贈制書帝御
大安閣見太祖世祖遺衣皆以縑素木綿為之重加補
綴嗟歎良久謂侍臣曰祖宗創業艱難服用節儉如此

朕敢頃刻忘之庚戌太白犯畢癸丑荆湖宣慰使圖托里烈受賂事覺召至京師御史臺臣請遣就鞫不允乙卯賜勲舊子色埒默昂輝特穆爾額森特穆爾鈔人萬五千貫以鈔千萬市羊馬給嶺北戌卒人驟馬二牝馬二羊十五禁驛戶無貨賣官地丙辰東安州水壞民田千五百六十頃戊午真定路武邑縣南水害稼奉元行宮正殿灾上都利用監庫火帝令衛士撲滅之因語羣臣曰世皇始建宮至于今安焉朕嗣登大寶而值此燬

此朕不能圖治之故也欽察衛兵戍邊有卒累功請賞以官帝曰名爵豈賞人之物命賜鈔三千貫大名路魏縣霖雨大同路鴈門屯田旱損麥諸衛屯田及永清縣水保定路歸信縣蝗六月寇圍寧都州民孫正臣出糧餉軍旌其門丁卯西番贊布凌諸寇未平遣徽政使超爾往督師戊辰毀特們德爾父祖碑追收原受制書告諭中外增乳母呼圖克台定襄郡夫人其夫阿拉追封定襄王諡忠愍壬申將作院使哈扎爾布哈坐罔上營

利杖流東裔籍其家留守司以雨請修都城有旨今歲
不宜興工其略完之癸酉置太廟夾室贈賜珠濟達台
吉為襄安王諸王布色特穆爾統兵北部別頒歲賜太
常請纂修累朝儀禮從之癸未填星犯畢乙酉易安滄
莫霸祁諸州及諸衛屯田水壞田六千餘頃諸王奇卜
數寇邊至是遣使來降帝曰朕非欲彼土地人民但吾
民不罹邊患軍士免於勞役斯幸矣今既來降當厚其
賜以安之秋七月辛卯朔宣政使奇徹台自傳旨署事

中書以體制非宜請通行禁止從之壬辰占城國王遣
其弟保佑八刺遮奉表來貢方物真定路驛戶饑賑糧
二千四百石癸卯太廟成巴勒丹坐贓杖免賜拉塔屯
田貧民鈔四十六萬八千貫市牛具甲辰諸王特穆爾
還自雲南入宿衛賜鈔二萬五千貫乙巳招諭左右兩
江黃勝許岑世興己酉封諸王呼圖克特穆爾為威遠
王授金印減海道歲運糧二十萬石免江淮增科糧甲
寅買馬行宮駕車六百五十匹丙辰永寧王布木特穆

爾不法命宗正府及近侍雜治其傳籍特們德爾家資
諸王齊齋克圖入朝請印帝以其政績未著不允賜鈔
二十五萬貫御史臺請降旨開言路帝曰言路何嘗不
開卿等選人未當爾瀋州雨水害屯田真定州諸路屬
縣蝗冀寧興和大同三路屬縣隕霜東路蒙古萬戶府
饑賑糧兩月八月癸亥車駕南還駐蹕南陂是夕御史
大夫特克實知樞密院事額森特穆爾大司農實達爾
前平章政事齊琳特穆爾前雲南行省平章政事諤勒

哲特們德爾子前治書侍御史索諾木特克實弟宣徽使索諾木典瑞院使托和齊樞密院副使阿薩爾僉書樞密院事章台衛士圖們及諸王諳達布哈博囉伊嚕布哈奇爾布哈烏魯斯布哈等謀逆以特克實所領阿蘇衛兵為外應特克實齊琳特穆爾殺丞相拜珠遂弑帝於行幄年二十一從葬諸帝陵泰定元年二月上尊諡曰睿聖文孝皇帝廟號英宗四月上國語廟號曰格根英宗性剛明嘗以地震減膳徹樂避正殿有近臣稱

觴以賀問何為賀朕方修德不暇汝不能匡輔反為詔

耶斥出之拜珠進曰地震乃臣等失職宜求賢以代曰

毋多遜此朕之過也嘗戒羣臣曰居高位食厚祿當勉

力圖報苟或貧乏朕不惜賜汝若為不法則必刑無赦

巴爾斯濟蘇下獄謂左右曰法者祖宗所制非朕所得

私巴爾斯濟蘇雖事朕日久今其有罪當論如法嘗謂

拜珠曰朕以幼沖嗣承大業錦衣玉食何求不得惟我

祖宗櫛風沐雨戡定萬方曾有此樂邪卿元勲之裔當

體朕至懷母忝爾祖拜珠頓首對曰創業惟艱守成不易陛下睿思及此億兆之福也又謂大臣曰中書選人署事未旬日御史臺即改除之臺除者中書亦然今山林之下遺逸良多卿等不能盡心求訪惟以親戚故舊更相引用邪其明斷如此然以果於刑戮奸黨畏誅遂構大變云

元史卷二十八

元史卷二十八考證

至治二年壬申保定雄州饑賑之庚午廣太廟 按壬申庚午支干顯係倒置但賑饑及廣太廟二事綱目及宋元通鑑俱不載無憑改正謹仍原文而識之

五月辛未駙馬托克托卒 按諸王有以駙馬封者其歿也應書薨考駙馬托克托不見諸王衣其非王爵可知原刻書薨不合史例今改

七年辛酉次渾源州 按渾源原刻訛澤源澤源州不

見於地理志惟大同路有渾源州與應州相近上文有車駕幸應州之文此處自係渾源今改

九月丙寅 按通考九月丙申朔合大小建計之月終或甲子或乙丑月內無丙寅日當係十月之朔或十月初二日耳但他書無可考據謹從原文而識之

十二月乙丑 按乙丑原刻作己丑以支干推之自係乙丑之訛今據天文志改

三年正月甲辰鎮西武靖王部饑賑之 按武靖原刻

訛武寧今據表改

